

四庫全書

史部

欽定四庫全書

史部

山東通志卷二十八之一

詳校官監察御史<sub>臣</sub>劉涓

檢討<sub>臣</sub>德生覆勘

總校官知縣<sub>臣</sub>繆琪

校對官主事<sub>臣</sub>范鏊

謄錄監生<sub>臣</sub>劉澐

欽定四庫全書

山東通志卷二十八之一

人物志

原夫二五妙凝篤生先喆聖模賢範萬世為昭詎  
能推其所自哉外此則恒視治運以稱隆焉大抵  
世昌則河嶽鍾靈化洽則鄉國萃美雖情迹萬品  
而太上立德其次立功其次立言三者足以概之  
乃若履潔懷貞晤言邁軸君子亦有碩人之慕焉

爰取舊志輯而增之以代為經以年為緯居行本末各有可觀覽二東之曩徽此足以觀矣方今

帝治昭明偉人接踵而是帙所載非崇祀者勿登蓋不逮什之三四爾誠以崧高之誦揚之雅歌華袞之褒操之柱史固非修方乘者所敢臆為取裁也作

# 人物志

人物一

兩漢 三國魏 東西晉 南北朝 隋  
按舊志分人物卓行孝義儒林大苑等門類

而以隱逸附於仙釋之後分校位置均失其宜夫人物總名也既列為總而又分其目則所謂人物者豈

又別有一種出於孝義文儒之外乎且既有卓行而又有孝義孝義獨非卓行乎既有儒林而又有文苑文苑儒林何所區別乎至列隱逸於仙釋之後蓋以仙釋為人物也是儒墨互陳而分顯晦為兩途也恐非天寶地靈之義矣今以時代為序併不分屬郡邑蓋不欲以一鄉一國掩天下之善士也尚論古人自有卓識何可過為區畫以臨其景行仰止也哉至舊志採自三代以迄於今夫三代人物皆見於經傳子史欲為搜輯務求該博而後無遺憾今止取左傳中齊魯世家摭拾一二以畢能事則墨漏之譏在所不免即就其所錄者如魯之季平齊之陳桓皆以功業許之則是以大聖人之筆削反不如鄉人之好惡也烏乎可故茲集所載與宦績同自漢始蓋以三代英華人所共見共聞春秋左穀等書即是人物總傳褒貶固有定論去取亦無異同正不必以剿說雷同矜淹博也

兩漢

崔廓

字少通號夏黃公齊人秦末與東園公轅秉綺里季朱暉角里先生周述隱於商山謂之

四皓高帝欲易太子呂后要張良用策良曰此非可以口舌爭也顧上所不能致者四人能招之來日侍太子則安矣乃使良邀四人上一日宴太子四皓侍上奇其貌各以姓名對上驚曰吾屢召不能致先生來乃從吾兒遊乎廓等對曰陛下善慢士士不苟就也太子仁孝有禮故臣等願事之上曰善於是儲位乃得安

田橫

故齊王榮弟項羽破齊橫收散亡復齊城邑立榮子廣而相之及廣死橫自立為王高帝

既定天下橫與其徒屬伍百餘人入居海島高祖召之曰橫來大者王小者侯不來且發兵加誅橫乃從

客二人乘傳詣洛陽至尸鄉謂其客曰橫始與漢王俱南面稱孤今漢王為天子而橫乃為亡虜北面事之其媿甚矣遂自剄使者馳奏高祖為之流涕以王者禮葬橫二客皆自刎伍百人在海中亦皆自殺

**彭越**

字仲昌邑人秦末漁鉅野澤中為盜陳涉起少年相聚請越為長沛公擊昌邑越以兵助

之漢二年越將其兵歸漢使略定梁地越常往來為漢游兵擊楚後漢與越期滅楚不至高帝用張良策發使許越王梁越乃至卒會兵破項羽垓下以功封梁王都定陶後為高帝所醢

**婁敬**

盧人高帝五年戍隴西過洛陽時帝建都之議未決敬因虞將軍見帝極陳都關中之利

帝即日西遷拜敬為郎賜姓劉氏平城之役敬言不可擊上怒其妄言沮軍械繫敬敬廣武後果有白登之圍七日始解上至廣武赦敬封為關內侯時數苦匈奴為邊患使敬往結和親又建言徙六國後及豪傑

名家實閥中為強本  
弱末之計帝從之

叔孫通

薛人秦時以文學徵待詔博士後亡歸漢拜博士號稷嗣君時高帝去秦儀法為簡易羣

臣飲輒爭功帝患之通說高帝徵魯諸生及弟子百餘人采古禮與共起朝儀通乃與魯諸生及弟子百餘人采古禮與秦儀雜就之為綿蕞野外習之月餘上之後竟置酒無敢譴諱失禮者帝曰吾乃今日知為帝之貴也拜太子太傅帝欲易太子通諫甚切惠帝即位徙通為奉常定宗廟及漢諸儀法

朱家

魯人高帝怨楚將季布數窘之購布千金布匿濮陽周氏所乃髡鉗衣褐賣之朱家家心

知是布乃買而置之佃誠其子曰田事聽此奴必與同食即乘軺車之洛陽說滕公曰布何罪臣各為其主耳且以布之賢而漢求之急此不北走胡當南走越忌壯士以資敵此伍子胥所以鞭荆平王之墓也



君何不從容為上言耶滕公心知朱家大俠意布匿其所果言於上而免之及布尊貴朱家終身不見布自闕以東莫不延頸願交焉

### 梁石君

號東郭先生齊人與匱生友善曹參為齊相初聞匱生名以禮聘為上客匱生曰臣之里

有夫死三日而嫁有終身不嫁者君將何取焉參曰吾亦取其終身不嫁者爾匱生曰齊有東郭先生梁石君世之賢士也隱於深山終不詘身下志以求仕君取婦之不嫁者取臣獨不取終身不仕之臣耶參乃因匱生東帛安車迎東郭先生厚禮之

### 田何

字子莊菑川人受易學於東武孫虞後徙杜陵因自號杜田生何授東武王同洛陽周王

孫丁寬齊服虔皆註易傳俱本之田何惠帝時屢徵不就帝親幸其廬受易一篇

韋孟

魯國鄒人為楚元王傅歷子夷王及孫王戊戌荒淫不道孟屢作詩以諫不從遂謝病歸

鄒陽

齊人景帝時吳王濞招致四方之士陽與嚴忌枚乘等至吳俱以文辯著名吳王陰有邪

謀陽上書諫不納去之梁從孝王遊被譖下獄上書自明王立出之卒為上客

胡毋生

字子都齊人治公羊春秋為景帝博士與董仲舒同業仲舒著書稱其德年老歸教於齊

齊之言春秋者宗事之

轅固

齊人以治詩景帝時為博士竇太后好老子書召問固固曰此家人言耳太后怒曰安得

司空城旦書乎上以固廉直拜清河太傅疾免武帝立復以賢良徵諸儒多嫉毀曰固老罷歸之時已九十餘矣公孫弘亦徵反目視固固曰公孫子務正學以言無曲學以阿世諸齊以詩顯者皆固之弟子

申培公

魯人少與楚元王交俱事齊人浮邱伯受詩楚元王子邱立命申公傳太子戊戊不好學

胥靡申公申公愧之歸魯居家教授弟子自遠方至受業者千餘人武帝使使東帛加璧安車迎申公至見上上問治亂之事申公已八十餘對曰為治不在多言顧力行何如耳上默然然已招致即以爲太中大夫

穆生

魯人與申生白生俱受詩於浮丘伯故與楚元王友善元王敬禮之穆生不嗜酒每爲設

醴及孫王戊即位忘設焉穆生曰醴酒不設王之意怠不去楚人將鉗我於市遂謝病歸

白生

魯國奄人受詩於浮丘伯與穆生申公俱爲楚中大夫後王戊淫暴胥靡白生

高堂生

泰山平陽人著士禮十七篇授瑕邱蕭奮奮授后蒼蒼授梁人戴德戴聖言禮者咸宗之

周霸

魯人與徐偃同受詩於申公霸為膠西內史偃為膠西中尉二人皆以廉節為王所重

關門慶忌

魯人受詩於申公官膠東內史以廉節稱

王仲

瑯邪不其人隱居不仕景帝時避濟北王與居之亂因浮海奔樂浪山家焉

汲黯

字長孺濮陽人孝景時為太子洗馬武帝即位黯為謁者時河內失火使往視之還報曰

不足憂也但臣過河內傷水旱父子相食以便宜持節發粟賑之請歸節伏矯制之罪上賢而釋之以數切諫不得留內遷東海太守以清靜為治黯多病卧閤內不出歲餘東海大治上聞召為主爵都尉列於九卿上曰古有社稷之臣黯近之矣黯為治持大體不拘文法而折不能容人之過嘗廷詰公孫弘多詐又責張湯於上前坐免數年復拜淮陽太守以諸侯相秩居淮陽卒於官

董仲舒

廣川人治春秋景帝時為博士下帷講誦弟子以次相受業三年不窺園非禮不行學士

皆師尊之武帝即位以賢良對策擢為江都相公孫弘嫉之時膠西王縱恣數害國內大吏弘乃薦仲舒可相膠西及仲舒至王深加敬禮仲舒凡相兩國所至皆有治聲歸家後不問生產所著春秋繁露雖公羊一家之學得聖經大義為多故

夫子留記云修吾書董仲舒也

路 卬

齊人景帝時官齊國中大夫時膠西菑川濟南三國並應吳楚惟齊王不與其謀三國各

以兵圍齊王使卬告於天子復令還報齊王使堅守卬至城下兵圍數重不得入三國要而脅之使反其言卬許之因望見齊王曰漢已破吳楚方引兵救齊必堅守無下三國欲誅之卬引頸就刑尋得免

嚴 安

齊國臨淄人武帝時以故丞相史上書言天下侈靡離本微末欲為制度以防其淫以和

其心後拜騎馬  
令官至少府

終軍

字子雲濟南人辯博能文年十八選為博士至長安上書言事武帝異其大拜為謁者給

事中奏對皆中上意累擢為諫大夫南越與漢和親乃遣使南越說其王令入朝軍自請願受長纓必羈南越王而致之闕下遂往說越王越王請舉國內屬天子大悅今使者留鎮撫之尋為越相呂嘉所殺時年二十餘故世謂之終童

尹齊

東郡茌平人以刀筆吏稍遷至御史事張湯湯數稱以為廉武帝使督盜賊斬伐不避貴

勢以能名  
拜為中尉

公孫弘

字季菑川人家貧牧豕海上年六十徵為博士使匈奴還報不合上意免歸五年復就徵

對策第一仕至丞相封平津侯丞相封侯自弘始於是開東閣以延賢人為布被脫粟之飯奉祿以給故人賓客家無所餘年八十終丞相位有故人滿意因言其詐轅固亦以曲學阿世戒之

東方朔

字曼倩平原厭次人武帝時上書稱旨待詔金馬門建元中以諫營上林苑拜為太中大夫

帝為賓太主置酒宣室使引內董偃朔陳偃有斬罪三不得入宣室帝善之時天下侈靡百姓多離農畝朔陳孝大節儉諷帝燔甲乙之帳却走馬示不復用又陳農戰強國之計朔指意放蕩喜諛譖然常觀察顏色直言切諫上雅納之著有客難及非有先生論世多以神仙目之又詳仙釋

孔臧

孔子十一代孫父蒙以都尉破項羽功封蓼侯臧嗣爵歷位九卿武帝時遷御史大夫辭

曰臣世以經學為家相承作訓法今俗儒繁說遠本難以妖妄難可以訓侍中安國受詔綴集古義臣乞

為太常典臣家業與安國紀綱古訓使永垂後嗣  
帝從之禮賜如三公著書十篇安國臧從弟也

顏異

曲阜人復聖十一代孫武帝時為濟南亭長以廉直見稱官至中大夫

孔安國

字子國臧從弟武帝時為博士丞詔作書傳又作孝經傳論語訓解

楊何

字叔元菑川人從王同受易以授太中大夫京房元光中亦徵為太中大夫

夏侯始昌

魯人通五經以齊詩尚書教授自董仲舒韓嬰死後武帝得始昌甚重之始昌明於

陰陽先言柏梁臺災至期果災後選為昌邑王太傅族子勝亦以儒顯名

主父偃

齊國臨淄人學長短縱橫術晚乃學易春秋遊齊諸子間為諸儒排擯不容於齊北遊燕

趙中山皆莫能厚乃西入關上書言九事其八事為律令一事諫伐匈奴與徐樂嚴安同召見上曰公等



皆安在何相見之晚一歲中自郎中四遷中大夫偃  
以諸侯地大易驕說上令諸侯得推恩分子弟以地  
上從其計元朔二年偃言齊王淫佚事  
遂拜為齊相王懼自殺上怒遂族偃

嬴

公

東平人與蘭陵褚大廣川段仲溫呂步舒俱  
事董仲舒受公羊春秋唯嬴公守學不失師

法為昭帝諫大夫授  
東海孟卿魯畦弘

兒

寬

千乘人治尚書受業孔安國貧無資用嘗為  
弟子都養時行貨作帶經而鋤休息輒誦讀

以射策為掌故功次補廷尉文學卒史寬為人溫良  
有廉知自將善屬文時張湯為廷尉會有疑奏掾史  
因使寬為之異日上問湯曰前奏非俗吏所及誰為  
之者湯言兒寬上曰吾固聞之久矣後舉侍御史見  
上語經學上悅擢為中大夫遷左內史寬既治民勸  
農桑緩刑罰理獄訟卑禮下士吏民大信愛之又奏

開六輔渠定水令以廣溉田收租歲時裁闢狹與民相假貸以故租多不入後有軍發以負租課殿當免民恐失之輸租絀屬不絕課復最累官御史大夫

雋不疑

渤海人治春秋為郡大學進退以禮武帝末暴勝之為直指使者逐捕盜賊督課郡國以

軍興誅不從命者勝之素聞不疑賢至渤海請與相見不疑曰為吏太剛則折太柔則廢威行施之以恩然後樹功揚名勝之敬納其戒表薦為青州刺史昭帝即位齊孝王孫劉澤交結郡國豪傑有異謀欲先殺青州刺史不疑發覺收捕皆伏其辜擢為京兆尹京師吏民咸服其威信

眭弘

字孟魯國蕃人少好任俠長乃變節從嬴公受春秋以明經為議郎至符節令元鳳三年

萊蕪南有大石自立孟推春秋之意當有從匹夫為天子者僵柳跡自立孟推春秋之意當有從匹夫為天子者

乃上其書霍光以為妖言伏誅  
後宣帝興於民間徵弘子為郎

**顏安樂**

字公孫魯國薛人家貧為學精力從晷孟治  
公羊春秋官至齊郡太守丞授淮揚泠豐潯

川任公由是顏  
氏有冷任之學

**孟喜**

字長卿東海蘭陵人父號孟卿善為禮春秋  
授后蒼疏廣世所傳后氏禮疏氏春秋皆出

孟卿喜從田王孫受易好自稱譽得易家候陰陽災  
變書自言得之田生而同門梁丘賀證其非是舉孝  
廉為郎博士缺衆人薦喜上聞喜改師法遂不用喜  
授同郡白光沛翟牧皆為博士由是有翟孟白之學

**后蒼**

字近君東海郅人從孟卿受禮  
說禮數萬言號曰后氏曲臺記

**費直**

字長翁東萊人治易為郎至單父令  
長於筮卦後瑯邪王璜能傳其業

江公

瑕邱人受穀梁春秋及詩於申公以詩授韋賢以春秋授榮廣至宣帝時三世博士

韋賢

字長孺魯國鄒人質朴少欲篤志於學兼通尚書以詩教授號稱鄒魯大儒徵為博士給

事中進授昭帝詩累遷大鴻臚宣帝初即位賢以與謀議安宗廟賜爵關內侯以先帝師甚見尊重本始三年為丞相封扶陽侯以老病乞歸丞相致仕自賢始卒謚節侯

龔遂

字少卿山陽南平陽人以明經為昌邑王郎中令王動作多不正遂為人忠厚剛毅有大

節內諫諍於王外責傳相引經義陳禍福面刺王過王至掩耳起走王廢遂以數諫諍減死宣帝以遂為渤海太守時歲饑多盜遂至飭屬縣捕盜吏曰諸持田器者皆良民吏無得問持兵者乃為賊詰之無少怠令下羣盜即時解散因開倉以賑恤之民有賣刀買牛賣劍買犢之謠數年吏民富實獄訟衰止上聞

徵為水  
衡都尉

王吉

字子陽瑯邪阜康人以郡吏舉孝廉為郎遷雲陽令舉賢良為昌邑中尉王好遊獵動作

無節吉上疏諫爭甚得輔弼之義及霍光迎王吉復奏書切戒王既廢羣臣皆坐誅惟吉與龔遂以忠直數諫得減死宣帝時復為諫大夫上疏言得失謂俗吏所以牧民者獨設刑罰以守之公卿之務在於期會簿書此非太平之基也上以為迂闊遂謝病歸吉魚通五經能為鄒氏春秋以詩論語教授學者好梁邱賀說易令子駿受焉與貢禹為友屢薦於朝故世稱王陽結綬貢禹彈冠即王子陽也

王式

字思翁東平人為昌邑王賀師以詩授王後王徵而復廢凡王左右近臣皆得死罪式曰

臣嘗以詩諫凡忠臣孝子必反覆諷誦於王冀王從於危亡失道之君未嘗不流涕陳戒而王卒不聽也

乃得減死歸家後宣帝時羣弟子爭傳武學譽於上  
復詔為博士武辭曰刑餘之人豈宜復充禮官謝病  
不起

丙吉

字少卿魯人治律令為魯獄史積功勞稍遷  
至廷尉右監武帝巫蠱事起詔吉治獄時宣

帝生數月以皇曾孫坐繫吉擇謹厚女徒令保養得  
全及帝即位絕口不道前恩帝後知之逆封博陽侯  
後五歲為丞相吉嘗出逢羣鬪者死傷橫道不問見  
牛喘問之或譏吉吉曰方春少陽用事未可大熱恐  
牛近行因暑故喘此時氣失節恐有  
所傷害也人以為知大體謚定侯

魏相

字弱翁濟陰定陶人徙平陵少好學以對策  
高第為茂陵令茂陵大治後遷河南太守禁

止姦邪豪強畏服人有告相賊殺不辜事下有司河  
南戍卒都官皆願留作一年以贖太守罪老弱萬餘

人守閭欲入上書宣帝即位徵為御史大夫言霍氏驕放宜削其權地節中為丞相封高平侯相總領衆職甚稱上意風雨災變郡不上相輒奏言之與丙吉同心輔政稱賢相謚憲侯

于公

東海郅人為縣獄史決獄平允東海有孝婦少寡無子養姑甚謹姑欲嫁之終不肯姑謂

隣人曰奈何以我久累丁壯遂自經姑女告婦殺母吏驗治之因誣服于公爭之勿得乃把其具獄哭於府上因辭疾去太守竟論殺之郡中枯旱三年後太守至卜筮其故于公曰孝婦不當死前太守強斷咎儻在是乎太守殺牛自祭孝婦因表其墓天立大雨嘗曰吾治獄多陰德後世必有興者令高大其門可容駟馬車後子定國孫永皆封侯

于定國

字曼倩東海郅人少學法律於其父于公以材高舉侍御史宣帝時為廷尉帝嘗稱之曰

張釋之為廷尉天下無冤民于定國為廷尉民自以不冤甘露中為丞相封富平侯諡曰安子永以孝行聞官至御史大夫尚館陶公主

夏侯勝

字長公魯人從始昌受尚書及洪範五行傳徵為博士霍光以太后省政宜知經術白令

勝用尚書授太后遷長信少府宣帝初即位議立武帝廟樂勝獨爭之下獄大赦出為諫大夫上知勝素直謂曰先生正言無懲前事遷太子太傅受詔撰尚書論語說及卒太后素服五日以報師傅之恩儒者以為榮

夏侯建

字長卿勝從父子師事勝及歐陽高左右采獲又從五經諸儒問與尚書相出入者牽引

以次章句具文飾說勝非之曰建所謂章句小儒破碎大道建亦非勝為學疎略難以應敵建卒自專門



名經仕至太子少傅故尚書有大小夏侯之學

梁丘賀

字長翁瑯邪諸人以能心計為武騎從太中大夫京房受易更事田王孫宣帝聞京房明

易求其門人得賀入說易上善之以為郎賀小心周密甚見信重官至少府圖形麒麟閣子臨亦以說易為黃門郎甘露中奉使問諸儒於石渠臨學精熟專行京房法

疏廣

字仲翁東海蘭陵人少好學明春秋徵為博士太中大夫累遷太子太傅兄子受字公子

亦以賢良舉為太子家令受好禮恭謹敏而有辭宣帝幸太子宮受迎謁辭禮閑雅遂拜受為少傅平恩侯許伯白使其弟中郎將舜監護太子家上以問廣廣諫以太子國儲副君師友必於天下英俊不宜獨親外家上善其言太子每朝太傅在前少傅在後父子竝為師傅朝廷以為榮廣為受言曰知足不辱知

止不殆乃上疏乞骸骨許之既歸鄉里日令設酒食與族人故舊相娛樂不為子孫增益產業曰賢而多財則損其志愚而多財則益其過既無以教化子孫不欲益其過而生怨也

孔霸

字次孺孔子十三代孫初為博士宣帝時為太中大夫元帝即位拜太師賜爵關內侯霸

為人謙退不好權勢上欲致霸相位霸辭讓不受自陳至三及卒上素服臨弔者再贈以列侯禮

蕭望之

字長倩東海蘭陵人後徙杜陵性好學治齊詩事同縣后蒼博士白奇又從夏侯勝問論

語禮服以射策甲科為郎及霍禹繼光為大司馬京師雨雹望之奏對陰陽不和是大臣任政一姓擅執之所致也天子拜望之為謁者累遷諫大夫丞相司直歲中三遷官至二千石後霍氏敗望任用以為平原太守望之雅意在本朝乃上疏勸上納諫臣遂徵入守少府宣帝察望之經明持重論議有餘材任宰

相欲詳試其政事復以為左馮翊上疏言西羌烏孫事三年為御史大夫又左遷為太子太傅帝寢疾以望之為前將軍受遺詔輔政元帝暗弱恭顯用事望之深嫉其奸謀去之不克反為所陷召赴獄乃飲酖自殺上聞之驚拊手曰曩固疑其不就獄果然殺吾賢傅

韋元成

字少翁魯國鄒人丞相賢次子少好學修父業尤謙遜下士以明經擢為諫大夫遷大河

都尉父賢卒兄弘以坐宗廟事繫獄賢門下生與宗家共矯賢令以元成為後元成佯為病狂讓其兄弘丞相御史劾奏元成實不病有詔引拜元成不得已受爵宣帝高其節使守河內以陪祀孝惠廟失儀削爵為關內侯後為淮陽中尉與諸儒論同異於石渠閣元帝永光中為丞相封侯故國元成為相七年守正持重不及父賢而文采過之諡共侯

貢禹

字少翁瑯邪人以明經博行徵為博士歷涼州刺史以病去官元帝時徵為諫大夫時年

歲不登郡國多困禹奏言當深察古道從其儉者灑灑數千言又乞罷采珠玉使百姓一意農桑議建漢家宗廟多不應古禮帝皆嘉納之官至御史大夫

周堪

字少卿齊人事夏侯勝治尚書為博士論於石渠經最高元帝即位堪為光祿大夫與蕭

望之竝領尚書事為石顯所譖皆免官望之自殺上愍之迺擢堪光祿勳

林尊

字長賓濟南人事歐陽高治尚書為博士論石渠官至少府太子太傅授平陵平當梁陳

翁生由是歐陽有平陳之學

京房

東郡頓丘人元帝時齊郡太守以考功法治郡後上封事言災異石顯誣之下獄死

歐陽生

字和伯千乘人受尚書於伏生以授倪寬寬授歐陽生子世世相傳至曾孫高為博士高

孫地餘以太子中庶子授太子尚書後為博士論石渠元帝即位至少府由是尚書世有歐陽氏學

徐良

字游卿琅琊人從梁人戴德延君學禮累官博士州牧郡守家世傳業由是大戴有徐氏

之學

諸葛豐

字少季瑯邪人以明經為郡文學御史大夫貢禹除為屬舉侍御史元帝時擢為司隸校

尉井以節加秩光祿大夫時侍中許章以外戚貴幸事多不法豐欲奏劾章適逢章私出豐駐車舉節詔

章下欲收之章馳車去豐追之章因得入宮乞哀遂收節後徙城門校尉免歸

薛宣

東海郯人元帝時為不其丞瑯邪太守趙貢行縣見宣悅其能奏遷樂浪都尉又為冤句

令所在皆著賢聲人稱貢  
為知人而宣為不負所舉

史丹

字君仲魯國人徙杜陵以父高任為中庶子  
元帝即位為駙馬都尉侍中詔護太子家後

帝寢疾欲易太子丹以親密臣得侍疾上獨寢時直  
入卧內伏青蒲上涕泣以死爭上意感悟謂丹曰無  
有此議太子得不易成帝即位累遷  
左將軍封武陽侯以病歸第諡頃侯

匡衡

字稚圭東海丞人性好學精力過人諸儒為  
之語曰匡說詩解人頗射策甲科以不應補

平原文學學者多上書薦衡經明後進皆欲從衡不  
宜在遠方宣帝不甚用儒術遣衡歸元帝時以史高  
薦累遷給事中時日食地震上疏言水旱之災生於  
賦斂宜減宮室之度省靡麗之飾考制度修外內近  
中正遠巧佞放鄭衛進雅頌舉異才開直言疏入上  
悅累遷御史大夫代韋元成為丞相封安樂侯成帝

即位復上疏戒妃匹勸經學及正南郊罷諸淫祀上優禮之後以子醉殺人而有司奏衡專地盜土遂坐免子咸亦以明經歷位九卿家世多為博士者

王章

字仲卿泰山鉅平人以文學為諫大夫忠直敢言成帝立遷司隸校尉大臣貴戚敬憚之

已遷為京兆尹時帝舅大將軍王鳳輔政章雖為鳳所舉非鳳專權不親附鳳會日食章奏封事召見言鳳不可任用宜更選忠賢上初受之而卒不能從竟為鳳陷以大逆死獄中

王駿

瑯邪阜康人諫議大夫王吉之子受易於梁邱賀以孝廉為郎陳咸匡衡薦駿經明行修

有專對才歷諫大夫司隸校尉奏免丞相匡衡遷少府成帝欲大用之出駿為京兆尹試以政事先是京兆有趙廣張敞王尊王章至駿皆有能名故京師稱曰前有趙張後有三王

白子友

齊人成帝時隱居東平陵南崇山石室躬耕養母慮糧儲不繼因自食橡栗飲水以讀易

神為夜降時朱雲陳咸皆自魯來師事之

朱雲

字游魯人徙平陵從白子友受易又從蕭望之受論語成帝時丞相張禹以帝師尊重而

潛阿王氏雲上書願賜上方斬馬劍斷佞臣一人頭以厲其餘上問誰也對曰安昌侯張禹上大怒御史將雲下雲攀殿檻檻折呼曰臣得從龍逢比干遊於地下足矣左將軍辛慶忌免冠叩頭曰此臣素著狂直使其言是不可誅其言非固當容之上意解後當治檻上曰勿易因而葺之以旌直臣

師丹

字仲公瑯邪東武人治詩事匡衡舉孝廉為郎後為東平王太傅丞相翟方進御史大夫

孔光舉丹議論深博廉正守道徵為光祿大夫成帝末為太子太傅哀帝即位為大司馬尋徙大司空封



高樂侯丹自以師傅居三公位得信於上書數十上多切直之言時欲追尊定陶共王為共皇帝傳太后為共皇太后丹抗議切諫以為非所以明尊無二上重大宗承正統之義由是不合帝意遂罷歸平帝即位復封義陽侯諡曰節

馬宮

字游卿東海戚人治嚴氏春秋以射策甲科為郎後為丞相司直師丹薦宮行能高潔遷

廷尉平青州刺史汝南九江太守所在見稱徵為詹事光祿勳代孔光為大司徒為太師封扶德侯

蕭育

字次君東海蘭陵人太傅望之子少以父任為太子庶子元帝時為御史大夫歷右扶風

有威望成帝時以育為太山太守嘗上章請還王章妻子之徙合浦者許之併贖還其故有田宅南郡多盜又移育為南郡太守所至盜即平仕終光祿大夫執金吾弟咸字仲為茂才累遷河東太守李第由

字子驕舉賢良為定陶令累遷安定江夏陳留三郡太守治績皆有賢聲人稱克世其家

**伏**

**理**

字君游瑯邪東武人世稱名儒以詩授成帝理與師丹同受詩於匡衡官至高密傳由是

齊詩有師伏之學行于世

**房**

**鳳**

字子元不其人治穀梁春秋大將軍王根薦鳳明經通達遷五官中郎將與王龔劉歆共

校書歆嘗欲立左氏春秋帝以問鳳鳳是其說大司空師丹奏歆非毀先帝所立乃罪歆出鳳為九江太守至青

州牧

**鄭**

**弘**

字稚卿泰山剛人與兄昌俱明經通法律昌為涿郡太守弘以南陽太守入為右扶風代

韋元成為御史大夫坐與京房議論免官

樓護

字君卿齊人少為醫長安後學經傳為王氏五侯上客護為人短小精辯議論常依名節

舉方正為諫大夫使郡國稱意擢為天水太守數歲免復以薦為廣漢太守元始中封息鄉侯

快欽

字幼卿齊人受大夏侯禮於長安許商商嘗目欽為文學之科哀帝時為博士徒眾尤盛

鄭崇

字子游高密人少為郡文學史至丞相大車屬哀帝擢為尚書僕射數廷爭上納之每見

曳革履上笑曰我識鄭尚書履聲上欲封傅太后從弟商崇諫以無故封商壞制度非傅氏之福傅太后大怒上即下詔封商又以幸董賢過度諫由是重得罪尚書令趙昌素少崇因誣以重罪死獄中

陳湯

字子公魯人博達善屬文以薦為郎數求使外國遷西域副校尉與甘延壽俱出湯為人

沈勇有大慮多策謀喜奇功與甘延壽矯制發師遂斬郅支單于揚威萬里拜湯為射聲校尉爵闕內侯

後驗湯言康居王為侍子不實論死以谷永疏救奪爵為士伍西護都護段會宗為烏孫兵所困朝用湯議悉如所料元始中追諡湯封湯子為侯

孔光

字子夏孔子十四代孫明經學成帝時為博士奉使稱旨時博士選三科光以高第為尚

書累遷光祿勳凡典樞機十餘年守法度修故事據經法以心所安而對不希指苟合時有進諫輒削草稿恐彰主過後代翟方進為丞相封博山侯哀帝立光以先帝時議繼嗣有持異之隙又重忤傅太后指遂策免嗣旬歲間閱三相皆不及光上由是思之徵光為大夫尋為丞相復故國博山侯平帝時王莽為大司馬權日盛光憂懼不知所出明年光為太師稱疾辭位歸老於第諡簡烈侯

孔均

字長平孔子十六代孫平帝時封褒成侯王莽欲以為太尉三以疾辭

王崇

瑯邪阜虞人京兆尹駿子以父任為郎歷刺史郡守有能名建平中為御史大夫坐記詛

下獄左遷大司農平帝初為大司空封扶平侯莽秉政崇謝病就國崇好飾車服及遷徙去所載不過囊

衣天下服其廉而怪其奢

鮑宣

字子都渤海高城人好學明經舉孝廉為郎哀帝時為諫大夫時丁傅子弟竝進董賢貴

幸宣上書言不宜敦外親小童又言故丞相孔光可大委任上以宣名儒優容之明年日食宣復上書言董賢但以今色諛言自進賞賜無度適以害之復徵何武師丹彭宣傳喜以應天心上納宣言拜宣為司隸以坐距閉使者下廷尉獄博士弟子王咸等守闕上書宣得減死徙上黨平帝即位王莽秉政案誅忠直不附已者宣及何武等皆死

張匡

字丈通山陽人習韓詩作章句屢徵有道博士不就

毋將隆

字君房東海蘭陵人大司馬王音奏請隆為從事中郎累遷潁川太守哀帝即位以高第

入為京兆尹遷執金吾時侍中董賢方貴幸上使中黃門發武庫兵前後十輩送董賢及上乳母王阿舍隆奏言武庫兵器天下公用繕治皆度大司農錢民力分於弄臣武兵設於微妾非所以示四方也請收還武庫上不悅後左遷南郡太守以不附莽免官徙合浦

索盧放

字君陽東郡人以前書教授千餘人初署郡門下掾更始時使者督行郡國太守有事當

死放前言曰今天下所以苦王氏歸心皇漢者實以聖政寬仁故也而傳車所過太守受誅誠恐天下惶懼各生疑變願以身代之遂前就斬使者義而赦之由是顯名

李忠

字仲都東萊黃人元始中以父任為郎更始立拜都尉與任光同奉光武為右大將軍累

以戰功封中水侯從平龐萌董憲等遷丹陽太守三公奏課為天下第一乃遷豫章太守以病去官圖形

雲臺

伏湛

字惠公瑯邪東武人為平原太守時赤眉兵起天下驚擾湛獨晏然教授不廢門下有欲

勸湛起兵者即斬首以徇於是吏民向信郡賴以全光武時徵拜大司徒封陽都侯數進諫言嘗奏行鄉飲酒禮上

嘉納之

王良

字仲子東海蘭陵人少好學習小夏侯尚書王莽時寢病不仕教授諸生千餘人建武三

年徵拜諫議大夫數有忠言以禮進止六年為大司徒司直在位恭儉布被瓦甒妻子不入官舍司徒史

鮑恢以事過東海見良妻布裙曳柴從田中歸恢乃下拜歎息後以病歸累徵不應

邴

漢

邴邴人以清行徵用至京兆尹太中大夫王莽秉政漢乞骸骨歸老於鄉里漢兄子曼容

亦養志自修為官不肯過六百石輒自免去其名過出於漢

郭巨

肥城人家貧父早逝事母苦甘旨不繼有子方三歲慮其常分母食因與妻謀曰吾不能

致豐美以奉母母又分半以飼子是貽親以饑也子可復得而親年不可復得不如瘞此子併力以事母遂掘地欲埋之至尺餘得黃金一釜鑄字十二曰天賜郭巨官不得取民不得奪

逢萌

都昌人家貧為亭長既而歎曰大丈夫安能長為人役乃之長安授尚書郎時王莽殺其

子宇萌謂人曰三綱絕矣不去禍將及即掛冠都城門攜其家浮海客於遼東及光武即位始還隱居勞



山屢徵  
不起

禽慶

北海人王莽時隱居不仕與向子平同遊五嶽遂不知所終又鮑宣傳云禽慶栗融薛章

薛方四人皆齊隱士去官不仕王莽

徐房

北海人與逢萌友善亦隱居不仕

王君公

平原人與同邑李子雲北海逢萌相友善同為尚書郎君公數言事不用辭疾歸得狂自肆以僮牛為生口無二價時人為之語曰避世牆東王君公

李子雲

平原人與王君公同為郎君公去官歸子雲即隨之隱居教授受業者常至千人

曹竟

字子期山陽人王莽篡漢去官不仕更始徵竟以為丞相不受會赤眉入長安竟手劍相

格不克  
死之

兒萌

齊郡人赤眉兵起萌兄第二人逃匿俱被執將殺之萌叩頭乞以身代兄賊兩釋之

伏隆

字伯文瑯邪東武人張步據齊地光武以隆為大中大夫持節使青徐拜步東萊太守會

劉永遣使立步為齊王步貪王爵執隆不聽復命隆上書曰隆奉使無狀雖在困厄授命不顧願以時進兵毋以臣隆為念遂被殺

度尚

字博平山陽湖陵人為郡上計吏拜郎中除上虞長尚為政嚴峻發摘奸非如神遷大

令遇時疫穀貴人饑尚開倉賑給及為荊州刺史窮追卜陽等賊破其三屯多獲珍寶時卜陽黨眾猶盛尚欲擊之而士卒驕富莫有鬪志尚潛焚其營珍積皆盡尚因曰卜陽等足富數年但恐諸卿不并力耳

所亡少少何足介意衆咸憤踊遂破平之後  
以討罪有功累官至遼東太守封右鄉侯

王望

字慈卿瑯邪人光武時自議郎遷青州刺史  
有威名時災旱望行部見百姓裸形草食以

便宜發給所在布衆事畢上言朝廷以望不先表請  
欲議罪鍾離意言望懷義忘罪不宜繩之以法乃赦  
之

王青

字公然東郡聊城人祖父翁與太守翟義起  
兵攻王莽弗克翁獨守節力戰莽遂燔燒之

父隆建武初為都尉功曹青為小史從都尉行縣道  
遇賊隆以身衛都尉遂死於難青被矢貫咽音聲流  
喝前郡守以青身有金夷竟不能舉張酺為東郡太  
守見之嘆曰豈有一門忠義而爵賞不及乎遂上疏  
薦青三世死節宜蒙顯異奏下三公由此為司空  
所辟仕至郡太守

高詡

字季回平原般人曾祖嘉以詩授元帝仕至上谷太守詡世傳魯詩以信行清操知名王

莽篡位不仕光武初以宋弘荐徵詡為郎歷博士大司農在朝以方正稱為郎歷博士大司農在朝以方正稱

曹曾

字伯山濟陰人千乘歐陽生傳伏生尚書至歆八世皆為博士曾從歆受尚書門徒三千

人積石為倉以藏書號曹氏書倉位至諫議大夫子祗河南尹傳父業

孔奮

字君魚從劉子駿受春秋左傳精究其義王莽之亂避地河西竇融以為姑臧長力行清

潔光武時官至武都太守

曹充

魯國薛人持慶氏禮建武中為博士從巡狩岱宗定封禪禮受詔立七廟三雍大射養老

禮儀明帝即位充上言漢再受命當自制禮以示百世拜侍中作章句辨難於是遂有慶氏學

丁恭

字子然山陽東緡人習公羊嚴氏春秋建武中為少府恭學義精明世稱大儒太常樓望

侍中承官長水校尉樊儵等皆受業於恭拜侍中祭酒光武每事咨訪焉

衛宏

字敬仲東海人少與河南鄭興俱好古學從九江謝曼卿受毛詩因作毛詩序善得風雅

之旨後從杜林更受古文尚書為作訓旨濟南徐巡師事之宏亦以儒顯由是古學大興光武以宏為議郎

甄宇

字長大北海安丘人習嚴氏春秋建武中為博士每臘詔書賜博士一羊羊有大小肥瘦

博士祭酒議欲殺羊分肉又欲投鉤宇乃先取最瘦者由是不復有爭訟後召會問瘦羊博士所在京師因以號之稍遷太子少傅子普普子承尤薦學諸儒以承三世傳業莫不歸服之

牟萇

字君高樂安臨濟人少習歐陽尚書不仕王莽建武二年拜博士遷河內太守諸生講學

者常有千餘人著尚書章句皆本之歐陽氏子紆隱居教授門生千人

禮震

字仲威平原人師事大司徒歐陽歆受尚書欽坐罪下獄震年十七自繫尚書求代歆死

曰歆學為儒宗八世博士門弟子幼未能傳學上令陛下獲殺賢之譏下使學者喪師資之益乞殺身以代歆命書奏而歆已死獄中乃徒步歸光武嘉其仁義拜震郎中

伏恭

字叔齊瑯琊東武人司徒湛兄子也湛弟黯明齊詩改定章句作解說九篇恭少傳黯學

光武時太常試經第一拜博士遷常山太守敦修學校教授不輟由是北州多為伏氏學明帝臨雍拜恭司空章帝行饗禮以恭為三老子壽官至東郡太守

周澤

字雅都北海安邱人少習公羊嚴氏春秋隱居教授中元初為屯池令奉公克己吏人愛

之拜太常果敢直言數有據爭明帝以北地太守廖信贓物班諸廉吏唯澤及光祿勳孫堪特蒙賜焉堪

字子穉明經學有志操以節介氣勇自行行類於澤故京師號曰二穉

王景

字仲通瑯邪不其人少學易沈深多技藝明帝時辟司空府詔景與將作謁者王吳共修

作浚儀渠吳用景塢流法水乃不為害後議修汴渠遣景與王吳修築景商度地勢鑿山阜破砥磧直截溝澗防過衝要疏決壅積十里立一水門令更相迴注夏渠遂成景由是知名後為廬江太守修起稻田

教用犁耕境內豐給

王扶

字子元掖縣人少修節行客居不其縣所在化其德國相張宗請謁不應欲強致之遂杖

策歸里太傅鄧禹聞其賢辟不至後拜議郎會見恂恂然性沈正不可干以非義永平中劉復著漢德頌稱扶為名臣云

牟

融

字子優北海安邱人少博學以尚書教授舉茂才為豐令州郡稱最永平中入為司隸校

尉多所舉正百僚敬憚之後由大司農進為司空融經明才高善論議舉動方重得大臣節肅宗朝為太尉叅錄尚書事

吳良

字太儀臨淄人為郎吏歲旦入賀門下掾王望舉觴上壽諂稱太守功德良曰望欺諂願

無受觴太守斂容而止東平王蒼薦其學通師法行中表儀明帝以為議郎因劾信陽侯陰就倚恃外戚無人臣禮左轉為郎邱長官終司徒長史



寒朗

字伯奇魯國薛人好經學永平中以謁者守侍御史與三府掾屬考按楚獄察出忠平等

奸誣力爭上前章帝幸洛陽錄囚徒理出千餘人拜為濟陽令終清河太守

江革

字次翁臨淄人少孤遭亂負母逃數遇賊涕泣哀求辭氣誠懇賊不忍殺指示避兵之方

遂得俱全轉客下邳貧窮裸跣行傭供母母終廬墓不除服永平初舉孝廉為郎補楚大僕終諫議大夫

董永

千乘人父亡無以葬乃從人貸錢一萬曰無償當以身作傭莫畢道遇一婦人求為永妻

永與詣錢主令織縑叁百匹以償一月而畢辭永曰我天之織女緣君孝上帝令我助君償債言訖凌空去

承宮

字少子瑯邪姑幕人少孤為人牧豕鄉里徐子盛以春秋授諸生宮息廬下聽講勤學不

怠三府更辟皆不就永平中徵拜博士遷中郎將數納忠諫朝臣憚其節名播匈奴單于使來嘗求見之

官至侍

中祭酒

曹褒

字叔通魯國薛人侍中充子傳父業博雅疎通章帝欲制定禮樂褒為博士上疏陳禮樂

之本制改之意拜侍中受命次序禮事依準舊典為百五十篇太尉張酺等非之漢禮竟不行出為河內太守時春夏大旱褒去姦殘澍雨降秋大熟復為侍中褒博物識古為儒者宗作通義十二篇又傳禮記四十九篇教授諸生千餘人慶氏學遂行於世

孔僖

字仲和自安國以下世傳古大尚書毛詩僖與崔篆孫駟相友善同遊太學習春秋章帝

以為蘭臺令史帝東巡幸闕里以太牢祠孔子僖因自陳謝應對稱旨拜郎中使校書東觀終於臨晉令

魏

應

字君伯任城人習魯詩為博士累官光祿大夫應經明行修弟子自遠至著錄數千人章

帝甚重之時會諸儒於白虎觀講論五經同異使應專掌難問侍中淳于恭奏之帝親臨稱制如石渠故事

戴

宏

字元襄濟北剛人膠東相吳祐聞宏諷誦之音奇而厚之願與為友宏知名東夏卒成儒

宗官至酒泉太守有清譽

鄭

均

字仲虞東平任城人兄為縣吏受禮遺均諫不聽脫身為傭得錢帛以與兄曰物盡可復

得吏坐賊終身捐棄兄悟遂廉潔州郡辟召稱疾不應建初六年公車特徵乃至再遷尚書數納忠言帝重之後病乞歸遂不起帝東巡過任城幸其舍賜尚書祿終身

淳于恭

字孟孫北海淳于人家有山田果樹人或侵盜輒助為收採又見偷刈禾者恭念其愧因

伏草中盜去乃起里落化之王恭末恭兄將為盜所烹恭請代得與俱免兄崇既卒恭養幼孤教誨學問有不如法輒反用杖自箠以感悟之兒慙而改過章帝下詔美恭素行除為議郎

魏霸

字喬卿濟陰句陽人建初中舉孝廉和帝時為鉅鹿太守以簡朴寬恕為政掾吏有過先

誨其失不改乃罷吏相毀訴霸稱他吏之長不及其短言者懷慙譖訟遂息後官至光祿大夫

童恢

字漢宗瑯邪姑幕人父仲玉值歲饑傾家賑恤族里全活者以百數恢少為郡吏執法廉

平除不其令吏民有違禁者隨方曉示其善者則嘉勞之教民耕織皆有條章比縣流民徙歸者二萬餘戶民嘗為虎所害恢設檻捕獲二虎咒曰王法殺人者死傷人則論法若殺人者當垂頭伏罪非者其號

呼稱寃一虎低頭閉目即殺之一視恆鳴號乃釋放吏人作歌以頌之後遷丹陽太守第翊字漢文以孝廉除須昌長治亦有異政

**戴封**

字平仲濟北剛人年十五詣太學師事東海申君申君卒封為營護喪葬至東海父母以

封當還豫為娶妻封經其家拜親不宿而去還京師卒業以對策第一遷西華令蝗不入境大旱禱請無獲乃積薪自焚火起大雨還中山相諸縣囚四百餘人辭狀已定當行刑封哀之皆遣歸與還尅期無一違者永元中徵拜太常

**孟宗**

字恭武孟子十九代孫事母至孝母嗜笋冬月未生宗入林泣之笋忽出取以供母後為

鹽池司馬自捕魚作鮓寄母母不受曰汝為魚官以鮓寄我非避嫌也後歷官司空

所輔

永初二年劇賊畢豪等入平原界縣令劉雄將吏士乘船追之至厭次河與賊合戰雄敗

被執賊以矛刺之時輔為小吏前叩頭求哀願以身代賊縱雄而刺輔貫心洞背即死東郡太守捕得豪等具以狀上詔書追傷之賜錢二十萬除父奉為郎中

王龔

字伯宗山陽高平人初舉孝廉行遷青州刺史劾奏貪濁二千石數人安帝嘉之徵拜尚

書建光中遷汝南太守政崇溫和引進郡人黃憲陳蕃憲不屈蕃遂就吏累官至太尉龔嫉宦官專權上書極言其狀諸黃門恐懼各使賓客誣奏龔罪李固乃奏記於梁商曰王公以堅貞之操而為讒人所搆語曰善人在患饑不及餐此其時也梁商言於帝乃得釋

成翊世

字季明平原樂陵人好學明道少為郡吏嘗諫鄧太后歸政後安帝徵為尚書郎見納用

延光中中常侍樊豐等譖太子保翊世詣尚書訟之  
深言中常侍樊豐等誣罔之狀不從豐因陷以罪下  
獄免歸及太子保復立是為順帝徵拜議郎不受  
執政者交引除尚書在朝正色百僚敬之

### 郎宗

字仲綏安邱人學京氏易善風角星算知占  
候吉凶安帝詔對稱旨拜吳令嘗上書言京

師當有大火記以時日果如其言上以博士徵之宗  
恥以占候見知夜懸印綬於庭遯居華山終身不歸

### 郎顗

字稚光安邱人父宗善風角星算為吳令顗  
少傳父業兼通經典勤心銳思朝夕無倦順

帝時災異數見公車徵顗乃拜章言其  
故復陳便宜七事拜為郎中辭疾不就

### 滕撫

字叔輔北海劇人初為涿令有文武才用太  
守以其能委任郡職風政修明流愛於人在

位七年道不拾遺順帝末揚徐盜起朝廷博求將帥  
以撫為九江都尉討賊大破之東南悉平以撫為左

馮翊所得賞賜盡分麾下撫方直不交權勢太尉胡廣承宦官旨奏黜撫故不得封天下冤之

范式

字巨卿山陽金鄉人少遊太學與汝南張劭為友竝告歸式為劭曰後二年當過拜尊親

乃尅期別至期劭白母請設其待范母曰二年之別千里約言爾何信之審耶劭曰巨卿信士必不乖違式果如期至後式仕郡功曹而劭寢疾嘆曰恨不見吾死友遂歿式夢劭來訣別即告太守馳往赴之劭將葬而柩不前移時乃見有素車白馬號哭而來者其母望之曰是必山陽范巨卿也留止冢次為修墳樹而去長沙陳平子亦在太學慕式不及見臨終乃製帛為書以遺式令其妻往見式式愴然悲泣乃營護其喪歸葬長沙計吏上式行三府竝辟不就舉州茂才四遷荊州刺史時有友人孔嵩以家貧親老變姓名充導騎式審識之把臂語平生甚歡勅縣代嵩嵩以先傭未竟不去式仕終廬江太守嵩亦為南海



太守俱  
有威名

趙 苞

字威豪東武城人舉孝廉為廣陵令視事三年政教清明邈遠西太守抗厲威嚴名振邊

俗遣使迎母及妻子垂當到郡母及妻子為賊劫質載以擊郡苞督兵禦之賊出母示苞母曰無負忠義遂力戰破賊母妻遂為所害苞葬母訖謂鄉人曰食祿以避難非忠也殺母以全義非孝也何面目立於天下嘔血而死封鄒侯

孔 季 彥

曲阜人孔子二十代孫守其家業門徒數百人梁人有繼母殺父其子殺之有司欲當以

大逆季彥曰繼母如母謂有父也今既殺父母名已絕昔大姜與弑魯桓春秋去其姜氏宜以非司寇而擅殺當之不當以逆論延光元年河西大雨雹安帝召見問故對曰此陰乘陽之徵也今貴臣擅權母后

黨威陛下宜修聖德慮此二者帝默然左右皆惡之  
季彥曰吾宜容媚勢臣而欺人主乎舉孝廉不就

滕延

字伯行北海人為濟北相時中常侍侯覽小  
黃門段珪在濟僕從賓客侵凌百姓劫掠行

旅延收捕殺數十人陳屍道路珪怒  
訴於帝坐免官後為京兆尹有理名

王暢

字茂叔山陽高平人太尉龔子舉茂才四遷  
尚書令出為齊相徵拜司隸校尉所治稱嚴

明以坐事免官太尉陳蕃薦暢清方公正由是拜為  
南陽太守奮厲威猛功曹張儼諫曰化人在德不在  
用刑暢因更崇寬政教化遂行郡中奢靡相尚  
暢以布衣皮褥矯之後官至司空名在八俊

公沙穆

字丈人膠東人習韓詩公羊春秋尤銳意河  
洛推步之術隱東萊山富人王仲欲以百萬

金與穆為資穆曰以貨求位吾不為也後舉孝廉遷  
繒相繒侯故不法穆至開喻之轉弘農令有善政

襄楷

字公矩平原人好學博古善天文陰陽之術桓帝時宦官專朝災異尤數楷詣闕上書言

災異之故殺太守成瑨劉瓚等之冤又云聞宮中立黃老浮圖之祠而嗜慾不去殺伐過理大違其道書上詔尚書問狀中平中徵為博士不至後罷黨禁賴平原相史弼爭之得免

司馬均

字少賓東萊人隱居教授不應辟命誠信行乎鄉里人有所爭輒曰而敢祝少賓乎不直

者終無敢言和帝時官至侍中以衰老歸賜大夫祿

孫斌

齊人桓帝時第五種為衛相斌為門下掾種善遇之種遷兗州刺史舉劾中常侍單超兄

子匡賊罪超以事陷種徙朔方超甥董援為朔方太守畜怒以待時斌已辭掾隱跡屠釣問具聞起謀乃謂其友人閭子直甄子然曰危者易仆可為寒心吾今方追第五使君庶免其難將以付子二人曰是吾

心也於是試晨夕追種於太原遮險格殺送吏以所乘馬與種斌自步從一晝夜行四百餘里匿種於閭甄二家後數年會赦種乃得脫歸

孫嵩

字賓碩北海安邱人延熹中京兆趙岐避宦官之禍自匿姓名賣餅北海市中嵩年二十

餘察岐非常人停車呼與共載岐懼失色嵩乃下車輶密問岐曰視子非賣餅者又相問而色動不有重怨即亡命乎我北海孫賓碩闔門百口勢能相濟岐以實告嵩歸向母曰出行乃得死友迎入上堂饗之極歡藏岐複壁中後岐得出仕至刺史太僕而賓碩亦從此顯名於東國

何休

字邵公任城樊人質朴訥口而雅有心思精研六經世儒無及者作公羊春秋詁解覃思

不闕門十有七年又註訓孝經論語皆經緯典謨不與守大同說以春秋駁漢事六百餘條妙得公羊本

意初太傅陳蕃辟之蕃敗坐廢黨禁解又辟司徒掾公表休道術深明宜侍帷幄倖臣不悅之乃拜議郎

屢陳忠言終

諫議大夫

張

儉

字光節山陽高平人初舉茂才以刺史非其人謝病不起延熹八年為東郡督郵劾中常

侍侯覽不軌及其母罪惡請誅之覽誣儉以黨遂亡命逃走望門投止人重其名行破家相容中平間徵拜少府不就建安初徵為衛尉見曹氏漸興闔門懸車不預政事

李

篤

東萊黃人黨錮起山陽張儉亡命止篤家黃令毛欽操兵到門篤引欽謂曰張儉知名天

下而亡非其罪縱儉可得寧忍執之乎欽因起謂篤曰遽伯玉恥獨為君子足下如何自專仁義篤曰篤雖好義明庭今日載其半矣欽嘆息而去篤因緣送儉出塞以故得免

劉

瓚

字丈里高唐人為太原太守時小黃門趙津與南陽太守成瑨竝考殺之宦官怨恚有司承旨瓚

瑨罪當棄市陳蕃上疏訟瓚等志欲去惡不宜令羣

豎妄相交搆不納竟死獄中天下冤之平原人襄楷亦上書訟冤不報

劉

儒

字叔林東郡陽平人舉孝廉遷侍中桓帝時詔求直言儒上封事辭甚忠切出為任城相

尋徵為議郎會竇武事下獄自殺儒為八厨之一郭泰嘗稱其口訥心辨有圭璋之質

劉

梁

寧陽人漢宗室桓帝時舉孝廉除北新城長儒化大行邑傳其教召拜為尚書郎

王

章

字伯儀東萊曲成人官少府卿為八厨之一

藩

嚮

字嘉景魯國人官郎中遭黨錮與王考等號為八厨

孔昱

字元世魯人霸七世孫昱少習家學大將軍梁冀辟不應舉方正對策不合辭病去後遭

黨禁錮靈帝時公車徵拜議郎補洛陽令

謝弼

字輔宣濮陽人性行方直建寧二年舉有道除郎中時災異數見弼上封事請崇孝道退

小人徵故司空王暢長樂少府李膺竝居政事左右惡其言出為廣陵府丞去官歸家中常侍曹節從子紹為東郡太守以他罪收考死獄中時人傷悼焉初平二年司隸校尉趙謙訟弼冤乃收紹斬之

陳耽

東海人靈帝時官至司徒以忠正稱光和五年詔公卿以謠言舉刺史二千石為民蠹害

者時太尉許緘等承望內官受取貨賄其宦者子弟賓客雖貪穢不問而虛糺邊遠小郡有惠化者二十人耽上言公卿率黨其私其言忠切由是諸坐謠言徵者悉拜議郎宦官怨之遂誣陷耽死獄中

劉寵

字榮祖東萊牟平人父丕博學號為通儒寵少受父業以明經舉孝廉除東平陵令仁慈

為民所愛以母疾棄官百姓泣留不得進乃微服遁歸遷會稽太守郡中大化徵為將作大匠瀕行山陰老人人齋百錢送寵寵為人選一大錢受之寵累登上卿而清約如寒素家無貨積後遷司徒太尉以病歸子輿為山陽太守著名於時

孟敏

字叔達邠人亞聖裔靈帝時黨錮禍起敏深自晦匿嘗荷甌墮地不顧而去郭林宗見而

異之問其故對曰甌已破矣顧之何益公府屢辟召皆不就

王考

字大祖壽張人官冀州刺史後遭黨錮名在八厨

檀敷

字丈有山陽瑕丘人家貧而志清連辟公府皆不就教授生徒至百數人靈帝時舉方正



對策再遷議郎  
補蒙令尋去官

羊陟

字嗣祖泰山梁父人少清直有學行舉孝廉高第累遷冀州刺史奏按貪濁所在肅然遷

尚書令劾太尉張灝等與宦豎相姻私公行貨賂急宜罷黜又薦前太尉劉寵司隸許永刺史楊熙劉恭龐艾清亮在公皆當升進拜河南尹計日受俸禁制豪右京師憚之會黨事起免官

賈琮

字孟堅東郡聊城人舉孝廉再為京兆尹靈帝初交趾作亂三府舉琮為交趾刺史琮到

部訊其狀咸言賦斂過重民不聊生故聚為盜賊琮即招撫流散蠲復徭役誅渠帥之為大害者簡選良吏撫循百姓以安在事三年為十三州最徵拜議郎時黃巾新破郡縣因緣重斂詔更選清能吏迺以琮為冀州刺史至則諸賊過者望風解印綬去大將軍何進拜琮為度遼將軍

羊續

字興祖泰山人其先七世為二千石卿校續以忠臣子孫拜郎中坐黨事禁錮十餘年後

累官廬江南陽郡太守破黃巾等賊前後斬級八千餘靈帝欲以續為太尉時拜三公者皆輸東園禮錢千萬令中使督之續乃舉緼袍示使人曰所資惟斯而已以此不登公位徵太常未及行卒帝勅太山守賻其家

陶丘洪

字子林平原人清達博辨文冠當代舉孝廉不就辟太尉府掾會河東太守史弼以忤宦

官受誣當棄市同郡孝廉魏劭行賂於侯覽得不死人譏弼以行貨得免為非洪曰昔文王美里閔散懷金史弼遭患意夫獻寶羣議遂息洪年三十卒

劉岱

東萊牟平人獻帝時為兗州刺史虛已愛士人爭附之黃巾賊破兗州岱力戰而死

鮑信

泰山陽平人少有大節寬厚愛人沈毅有謀初何進徵董卓等誅宦官卓將兵至騎都尉

信說袁紹乘其所至擒之紹不從乃引軍歸鄉里獻帝初為濟北相與曹操進兵擊黃巾於壽張東力戰

之死

張邈

字孟卓

東平人少以俠聞初辟公府稍遷陳留太守董卓之亂與曹操共舉義兵及袁紹

為盟主有驕色邈以正義責之陳宮勸邈迎呂布共據兗州邈從之尋為曹操所破邈詣袁術求救為其害下所

趙昱

字元達

琅琊人清已疑惡潛志好學為徐州別駕從事時徐州牧陶謙信用非所刑政不

理而昱以忠直見疎奏昱為廣陵太守

吳子蘭

歷城人獻帝時為將軍隨帝許田射獵惡曹操之不臣董承受密詔討操子蘭與承合謀

不克

而死

太史慈

字子義東萊黃人少好學仕郡奏曹史有名北海相孔融聞其名而奇之數謁問其母時

黃巾復來侵暴融出屯都昌為賊所圍母遣慈赴融慈求援平原相劉備乃得脫孫策東渡以慈為建昌都尉盜賊懾服慈猿臂善射弦不虛發常從策討麻保賊賊緣樓上行詈以手持樓楹慈引弓射之矢貫手著楹其妙如此

鄭玄

字康成北海高密人少入太學通京氏易公羊春秋三統歷九章算術又從東郡恭祖受

周官禮禮記左氏春秋韓詩古文尚書西入闕事扶風馬融質諸疑義融曰吾道東矣黨事起遂隱修經

業時何休好公羊學著公羊墨守左氏膏肓穀梁廢疾玄迺發墨守鍼膏肓起廢疾休見而嘆曰康成入吾室操吾矛以伐我乎大將軍何進辟之玄不受朝服而以幅巾見一宿逃去國相孔融深敬之公車徵為大司農以病乞還所注述百餘萬言經傳洽熟稱為純儒齊魯間宗之子益恩孫小同皆知名

仲長統

字公理山陽高平人博涉書記贍於文詞嘗謂名不常存人生易滅優游偃仰可以自娛

欲卜居清曠以自樂其志因作樂志論荀或舉為尚書郎後叅丞相曹操軍事每論說古今世俗行事恒發憤嘆息遂著論名曰昌言凡三十四篇

劉表

字景升山陽高平人魯共王後與同郡張儉等號為八顧初平中為荊州刺史襲破宗賊

江南悉平表因遣使奉貢以表為鎮南將軍領荊州牧封武城侯表假節以為已援於是威懷無洽萬里

肅清愛民養士從容自保又博求儒術闕西充豫學士歸者以千數及曹操與袁紹相持於官渡遣人求助表許之而不援後操自將征表未至表疽發背死

劉

洪

字允卓泰山蒙陰人魯王宗室延熹中徵拜郎中遷常山長史以父憂去官後為上計掾

拜郎中檢東觀著作律歷記官終山陽太守洪善算作七曜術及在東觀與蔡邕共述律歷記考驗天官及造乾象術十餘年考驗日月與象相應皆傳於世

庸生

名譚膠東人始孔安國傳古文尚書授都尉朝朝授譚譚傳古文尚書同郡賈逵為之作

訓馬融作傳鄭康成注解由是古大尚書遂顯於世

張

馴

字子雋濟陰定陶人以大夏侯尚書教授辟公府拜議郎與蔡邕共奏定六經文字擢侍

中典領祕書近署甚見寵異多因便宜陳政得失遷丹陽太守有惠政終於大司農

禰衡

字正平原般人孔融愛其才與為忘形交曹操欲見之不肯往操怒召為鼓史奏漁陽

操搥聲節悲壯吏呵曰何不改裝卽脫衣裸身而立徐取岑牟單絞著之復搥而去操欲殺之以其才名送之劉表表不能容送之黃祖祖長子射請賦鸚鵡援筆立就一座嘆賞卒以傲忽為祖所害

王修

字叔治營陵人年七歲母以社日亡至來歲社日修念母哀甚鄰里為之罷社

諸葛亮

字孔明瑯琊陽都人隱居襄陽隆中自比管樂昭烈帝屯新野徐庶薦之帝凡三顧其廬

亮乃見與談天下大勢帝悅延為軍師合吳破魏西取益州後主卽位以丞相封武鄉侯建興三年平定南蠻之地五年率諸軍北駐漢中上表出師明漢賊不兩立王業不偏安誓以鞠躬盡瘁死而後已六年

出散關破王雙七年復武都陰平二郡九年出祁山  
敗張郃覆其軍十二年出武功屯五丈原與司馬懿  
相持百餘日病卒於軍諡曰忠武子瞻尚公主拜騎  
都尉景耀四年魏遣鄧艾侵蜀遺瞻書使降瞻斬其  
使與艾戰不克而死瞻子尚拒艾於涪州  
軍潰乃馳赴魏軍而死自亮入蜀凡三世

任旄

字子嶺樂安博昌人守節厲行黃巾賊至聞  
旄姓名曰夙聞任子嶺天下賢士禁勿入其

鄉

孫期

字仲或濟陰成武人習京氏易古文尚書家  
貧事母至孝牧豕於大澤中以奉養焉遠人

從其學者皆執經壟畔黃巾賊起過期里陌相約不  
犯孫先生舍卽舉方正遣吏齎羊酒請期期驅豕入  
草不顧司徒黃琬  
特辟不行終於家



管寧

字幼安臨朐人少與華歆邴原同學寧獨自命不凡嘗與歆共鋤地見土內一金寧揮鋤

不顧歆則既捉而後擲之又乘軒過門者歆輒廢書往視寧曰子非吾友也乃割席分坐後黃巾起寧避地遼東魏武十徵皆不至歆則助曹為逆邴原亦仕魏為五官將長史惟寧得終隱焉

孔融

字大舉孔子二十代孫少喪父哀悴過毀山陽張儉以黨錮下郡捕急儉與融兄褒有舊

亡抵褒不遇融舍之事泄儉脫走並收褒融獄融曰藏匿者融也當坐褒曰彼來求我非弟之過請甘其罪使問其母母曰家事任長妾當其辜一門爭死不能決竟坐褒獻帝時為北海相又徵為少府曹操憚其剛正誣殺之

劉虞

字伯安東海郯人舉孝廉為博平令盜賊止息蝗不入境遷幽州刺史民夷感其德化遂

拜幽州牧後加大司馬封襄賁侯虞在幽務存寬政  
念利民物以故民悅年登青徐士庶避難歸虞者百  
餘萬口皆收視溫恤為安立生業初平時袁紹等以  
虞為宗室長者欲上虞尊號虞厲色叱之後為公孫  
瓚所殺

劉繇

字正禮東萊牟平人太尉寵之姪舉孝廉為  
郎除下邑長時郡守以貴戚託之遂棄官避

跡淮浦興平中為揚州刺史袁術據淮南繇遣將屯  
江邊以拒之加揚州牧振武將軍及孫策東渡繇奔  
丹徒沂江南保豫章罕融  
先至據郡繇攻融破之

糜竺

字子仲東海朐人祖世貨殖資產鉅萬徐州  
牧陶謙辟為別駕從事謙卒竺奉謙遺命迎

先主於小沛會呂布襲下邳先主轉軍海西竺進妹  
為夫人金銀貨幣以助軍資後魏武表竺領贏郡太

守竺去官隨先主周旋及益州既平拜為安漢將軍  
竺雍容敦雅先主待為上賓子威官至虎賁中郎將  
伊籍字機伯山陽人隨先主南渡江從入益州益  
州既定以籍為左將軍從事中郎嘗使吳孫  
權聞其才辦欲折以辭籍語甚機捷  
竟不能折權甚異之後遷昭丈將軍

### 三國魏

程昱

字仲德東阿人黃巾起昱率大姓薛房等環

為從事及征徐州使與荀彧留守鄆城張邈兵至郡  
縣鄉應唯鄆城范東阿不動乃表昱為東平相屯范  
昱當勸魏武因三城以圖霸業不必與袁紹連和後  
中夏斬平魏武拊昱背曰非用君言吾何以至此宗  
人奉牛酒大會昱曰知足不辱可以退矣乃自表歸  
兵闔門不出文帝踐阼進封安鄉侯卒贈車騎將軍

諡曰肅

王

粲

字仲宣山陽高平人蔡邕一見奇之嘗曰吾家文章書籍盡當與之始避亂荊州依劉表

魏國既建拜侍中初粲與人共行讀道邊碑人問曰卿能闇誦乎曰能因背誦不失一字觀人圍棋局壞粲為覆之不誤一道其疆記默識如此每屬文舉筆便就時人常以為宿構然正復精思不能加也著漢末英雄詞詩賦論議五十餘篇

徐

幹

字偉長北海人建安七子之一為司空軍謀祭酒掾屬五官將文學後除上艾長以疾不

行著中論二十篇文帝嘗與吳質書曰偉長懷文抱質恬淡寡慾有箕山之節可謂彬彬君子矣

劉

楨

字公幹東平人文帝時為五官將及平原侯植皆好文學楨與王粲等號建安七子並皆

友善積辭旨巧妙特為諸公子所親愛太祖辟為丞相掾屬後以不敬被責後復署吏著文賦數十篇

朱

靈

字文博清河人初為袁紹將太祖征陶謙紹使靈督三營助戰有功遂留魏屢立戰功為

名將勲亞徐晃及文帝即位封靈郿侯詔曰將軍典兵歷年威過方召功踰絳灌圖籍所美何以加焉後

人封高唐侯卒諡威侯子術嗣

董

昭

字公仁濟陰定陶人初參袁紹軍事後以張揚薦歸魏勸太祖興義兵以輔王室又議封

建通海運足糧儲談兵設險悉出機筭而卒成全魏之功累官光祿大夫卒諡曰定

崔

琰

字季珪清河東武城人少就學鄭玄袁紹辟之為都騎尉太祖破袁氏辟為別駕魏國初

建拜琰為尚書後遷中尉琰生平清忠高亮雅識經遠推方直道正色於朝文武羣才多所薦拔朝士瞻

望而太祖亦  
甚敬憚焉

樂進

字文謙陽平衛國人容貌短小膽畧過人從太祖征伐皆先登有功封廣昌亭侯太祖嘗

稱之曰武力既弘計畧周備墳忠信一守執節義後遷右將軍卒諡威侯子緄果毅有父風官至揚州刺史

郗原

字根矩北海朱虛人少以操尚稱州府辟命皆不就時黃巾方盛遂至遼東一年中歸原

者數百家遊學之士教授之聲相繼不絕後太祖辟為司空掾徙署丞相徵事武城崔琰嘗以原與張範並稱曰徵事郗原議郎張範皆秉德純懿志行忠方清靜足以厲俗正固足以幹事所謂龍翰鳳翼國之重寶舉而用之不仁者遠後代涼茂為五官將長史閉門自守非公事不出

國

淵

字子尼樂安人事太祖為司空掾屬每於公朝議論常直言正色退無私焉太祖置屯田

使淵典其事淵相土處民計民置吏明功課之法五年中倉廩豐實百姓樂業征闕中時以淵為軍府長史田銀等既破獲其餘黨淵以為非首惡請不行刑太祖從之賴淵得生者千餘人後遷魏郡太守入為太僕卿雖居卿位而布衣蔬食祿賜皆散之故舊宗族子泰徵為郎

涼

茂

字伯方山陽昌邑人少好學論議常據經典以處是非太祖辟為司空掾補侍御史時泰

山多盜賊以茂為太守旬月之間襁負而至者千餘家轉為樂浪太守公孫度在遠東擅留茂不遣之官茂終不為屈後徵還為魏郡太守甘陵相所在有治績魏國初建遷尚書僕射後為中尉奉常

徐  
奕

字季才東莞人太祖辟為司空掾屬從西征馬超留為丞相長史鎮撫西京時人稱其威

信伐吳以奕為留府長史謂奕曰君之忠亮古人不  
過也尋進尚書令遷中尉復手令曰昔楚有子玉夫  
公為之側席汲黯在朝淮南為之折謀詩  
攝邦之司直君之謂歟後拜諫議大夫

臧

霸

字宣高泰山人初為瑯邪相督青徐二州太  
祖與袁紹相拒霸數以兵入青州紹是以不

敢東向太祖嘗謂東州掇攘霸執義征伐清定海岱  
功莫大焉進封為都亭侯及文帝踐阼徙封良成侯  
每有軍事帝常諮訪明帝即位增邑五百戶卒謚威侯子艾官至青州刺史

孫

觀

字仲臺泰山人與臧霸俱起討黃巾太祖破  
呂布使霸招觀兄弟厚遇之拜騎都尉屢與

霸共戰伐觀常為先登征青徐二州有功封都亭侯  
從征孫權於濡須口為流矢所中力戰不顧太祖勞  
之曰將軍被創深重而猛氣益奮不當為  
國愛身乎轉振威將軍子毓官青州刺史



任 嘏

字昭先博昌人年十四始學疑不再問三年中誦五經皆究其義無已羣言無不綜覽時

人謂之神童會太祖召海內至德嘏應其舉為臨菑侯官屬文帝時為黃門侍郎每納忠言帝嘉其淑慎累遷河東太守所在化行有遺風餘教嘏為人淳粹凱悌虛已若不足恭敬如有畏修身履義皆沈默潛行不顯其美故時人少得稱之著書三十八篇帝命下祕書以貫羣言

王 觀

字偉臺東郡廩丘人事太祖為丞相文學掾出為高唐陽泉鄴任令所在稱治文帝踐阼

入為尚書郎出為南陽涿郡太守治身清素阡下以儉僚屬承風莫不自勵明帝幸許昌召觀為治書侍御史典行臺獄時多有倉卒喜怒觀毫

不阿順意指後封陽鄉侯卒諡肅侯

虞 溥

字允源高平昌邑人專心墳籍魏黃初時為鄱陽內史修庠序作誥以訓諸生曰聖人之

道淡而寡味故始學者不好也夫工人之染先修其質後事其色質修色積而染工畢矣學者不患才不及而患志不立積一勺以成江河累微塵以崇峻極匪志匪勤理無由濟也為政嚴而不猛風化大行註春秋  
經傳

王基

字伯興東萊曲成人黃初中察孝廉累官中書郎明帝盛修宮室基上疏極諫辭意誠懇

及出為安豐太守郡接吳境基為政清嚴有威惠明設防備敵不敢犯時曹爽專柄基著時要論以切世事毋邱儉有淮南之逼基進兵破之遷鎮南將軍都督豫州諸軍事後又以擊諸葛誕有功遷征東將軍甘露四年轉征南將軍卒諡景侯

鮑勛

字叔業泰山平陽人太祖辟為丞相掾及大皇帝受禪勛每陳今之所急惟在軍農寬惠百

姓臺榭苑囿宜以為後黃初四年為御史中丞百僚嚴憚罔不肅然勛生平立朝守正不阿屢以抗言極諫上觸帝怒終不少屈且素以清白自持廉而能施身後家無餘財人莫不知其高節

崔林

字德儒清河東武城人尚書琰從弟少無名望琰獨異之知其晚成太祖除為鄆長及征

壺關較長吏德政林政為最遂擢冀州主簿文帝踐阼拜尚書出為幽州刺史明帝即位賜爵關內侯景初二年散騎侍郎孟達薦林為司空稱其忠直清儉可比古人封安陽亭侯邑陸百戶卒諡孝侯

程曉

字季明東阿人安鄉侯昱之孫嘉平中為黃門侍郎時校事放橫曉上書言其外托天威

以為聲勢內聚羣奸以為腹心大臣耻與分勢含忍而不言小人畏其鋒芒鬱結而無告於是斥罷校事

曉遷汝

南太守

王朗

字景興東海郟人太祖時徵拜諫大夫叅司空軍事魏國初建以軍諮祭酒領魏郡太守

遷少府奉常文帝即王位遷御史大夫封安陵亭侯上疏勸育民省刑及文帝踐阼改為司空進封樂平鄉侯上疏諫止游獵帝深納其言明帝即位進封蘭陵侯上疏諫止營造帝報曰忠至者辭篤愛重者言深君既勞思慮又手筆將順三復德音欣然無量朗高才博雅多所著作卒諡曰成

呂虔

字子恪任城人有膽畧才識過人初為掾史漢末領泰山太守會濟南黃巾起虔引兵與

夏侯淵同擊之黃巾悉平遂督青州諸郡兵東討李條戰捷太祖深嘉之文帝即位封益壽亭侯遷徐州刺史請瑯琊王祥為別駕民事一以委之世多其能任賢才有古大臣風明帝即位封萬年亭侯增邑二

百戶

王肅

字子雍東海郳人樂平鄉侯朗子黃初中為散騎黃門侍郎太和三年拜散騎常侍四年

司馬曹貞伐蜀肅上疏以雨水艱劇宜為休息於是罷兵景初間肅以常侍領祕書監兼文觀祭酒上疏勸帝省徭役重稼穡敦信滅刑帝每以事問肅肅皆以正對帝亦深納其言正始元年為侍中遷太常時曹爽為大將軍任用何晏鄧颺等肅正色曰此輩即弘恭石顯屬也爽戒晏等曰當共慎之其畏憚有如此其所撰尚書詩論語三禮左氏解及定父朗所作易傳皆列於學宮卒贈衛將軍諡景侯子恂嗣爵亦以清節名

孫該

字公達任城人仕至陳郡太守復入著作景元中卒嘗著魏書及文賦等傳世

孟康

字公休孟子十八代孫歷官至廣陵亭侯註漢書

高堂隆

字升平泰山平陽人魯高堂生後少為諸生泰山守薛悌命為督郵郡督軍與悌爭論名

悌面呵之隆按劍叱曰昔魯定見侮仲尼歷階趙彈秦箏相如進正臨臣名君義之所討也督軍失色悌驚起止之後太祖召為丞相軍議掾黃初中為平原王傅王即尊位是為明帝以隆為給事中累遷光祿勳隆事明帝屢立疏規諫直同史魚史稱其學業修明志在匡君因事陳戒發於懇誠

滿寵

字伯寧山陽昌邑人年十八為郡督郵後太祖辟為從事遷汝南太守蜀將攻樊城寵力

戰有功封安昌亭侯文帝即位寵破吳於江陵更拜伏波將軍明帝時孫權圍合肥寵伏兵擊破之又破權軍於新城景初二年遷太尉寵不治產業家無餘貲詔賜帛及錢穀以表清節卒諡景侯

孫叔然

樂安人本名炎以字稱受學鄭康成之門人稱東川大儒徵為祕書監不就王肅集聖證

論以譏短康成炎馭而釋之及作周易春秋例毛詩禮記春秋三傳國語爾雅諸注又著書十餘篇

王恂

字子良東海郟人衛將軍樂平鄉侯肅子景元四年以肅勲封蘭陵侯在朝正直居心公

忠有匪躬之節高令表毅餽以駿馬恂知其貪財遂不受後穀果以贖貨致敗年四十餘卒贈車騎將軍

孔乂

字元儒孔子二十代孫祖父皆二千石乂為濟南相與吳瑤顏斐任燠令狐邵並著賢聲

正始八年乂為散騎常侍上疏規諫勸帝以循禮復古無末丹之飾不懈於位平公正之心審賞罰戒習騎為天下福意甚忠摯後至大鴻臚諫議大夫

任燠

樂安人為清河太守有賢聲與魏郡太守吳瑤京兆太守顏斐弘農太守令狐邵濟南相

孔乂或哀矜折獄或推誠惠愛或治身清白或擿奸發伏咸為良二千石史冊並稱美焉

顏斐

字文林濟北人有才學太祖時召為太子洗馬黃初間轉為黃門侍郎後為京兆太守始

京兆民人不專農殖斐到官乃令屬縣整阡陌樹桑果置車買牛民始以為煩一二年間家有車牛人民豐富又起文學聽吏民欲讀書者復其小徭於是教化大行吏民愛之青龍中遷平原太守吏民遮道不得前稽留十餘日乃出界因立碑稱頌之

王儀

字民表北海營陵人性正直不畏權勢為安東將軍司馬昭東關之戰兵潰問曰近日之

事誰任其咎儀對曰責在元帥昭怒曰司馬欲委罪於孤耶斬之子哀痛父死非命終身不仕晉

王經

字彥偉清河人魏甘露中為尚書高貴鄉公將討司馬昭經與侍中王沈散騎常侍王業

並諫不聽沈與業曰不如奔告司馬公拉經同往經不可曰吾子行矣及高貴鄉公被廢收經刑於東市



晉太始初褒其  
守志官其孫

王哀

字偉元營陵人父儀為司馬昭所殺哀累辟不就廬墓側旦夕拜跪攀栢悲號涕淚著樹

樹為之枯母存日畏雷沒後每雷震輒至墓跪曰哀在此讀詩至哀哀父母生我劬勞未嘗不反覆流涕門人為廢蓼莪之篇家貧躬耕計口而田度身而蠶或有功遺皆不受及司馬氏篡魏哀終身不西而坐

諸葛靚

瑯邪陽都人父誕魏司空為大帝所誅靚奔吳為大司馬吳平逃匿不出武帝與靚有舊

靚姊又為瑯邪王妃帝知靚在姊間因就見馬靚逃於廁帝又逼見之靚流涕曰不能漆身披面不期今日復覩聖顏詔以為侍中固辭不拜歸於鄉里

諸葛瑾

字子瑜瑯邪陽都人蜀漢丞相武鄉侯亮之兄事吳為長史轉中司馬嘗使蜀與亮公會

退無私面與孫權談論但粗陳指歸如有未合則舍而及他徐復託事造端以物類相求於是權意多釋或言瑾別遣親人與昭烈相聞權曰子瑜之不負孤猶孤之不負子瑜也黃武元年累遷左將軍封宛陵侯

徐盛

字大鶻瑯琊莒人為孫權司馬守柴桑大破黃祖兵復討山賊有功徙中郎將後屢立戰

功遷安東將軍封蕪湖侯及魏文帝大出有渡江之志盛獻計從建業築園作薄落園上設假樓江中浮船相往來諸將以為無益盛不聽因請用之及大帝南侵車駕駐廣陵望園愕然彌沒數百里而江水盛長曰長江天塹此天之所以限南北也便引軍退諸將皆服其智子指襲爵領兵

晉

王祥

字休徵瑯邪臨沂人性至孝事後母朱氏恭謹竭誠母病欲食魚時方冰凍祥輒解衣欲

卧冰上求之冰忽自解雙鯉躍出又思黃雀炙復有黃雀數十飛入其幙取以供母明帝時徐州刺史呂虔聞之辟為別駕委以州事政化大行甘露中累遷太常封萬歲亭侯上詣太學命祥為三老天子北面乞言祥陳帝王君臣政化之要聞者莫不砥厲及武帝踐阼拜太保封睢陵公祥以年老屢乞歸里帝不從後賜几杖不朝大事仍諮訪之年八十有五卒諡曰元

王覽

字元通臨沂人太保睢陵公祥異母弟母朱遇祥無道覽年數歲見祥被楚撻輒涕泣抱

持至成童每諫其母毋以非禮使祥覽輒與俱入虐使祥妻覽妻亦趨而共之朱密使酖祥覽知之徑起取酒祥疑有毒爭而不與朱遽奪反之自後朱賜祥饌覽輒先嘗朱遂止覽仕至光祿大夫卒諡曰貞六

子皆貴顯孫  
藻為東晉相

任

愷

字元寢樂安博昌人官中書侍郎晉國建為侍中封昌國縣侯愷有經國之幹萬機大小

多綜管之性中正以社稷為己任帝罷之政事多諮焉初愷惡賈充為人不欲令久執朝政每加裁抑後充與荀勗馮紇乘間浸潤遂免官後起為太常不得志卒諡曰元子罕以淑行稱歷兗州刺史大鴻臚

羊

祐

字叔子泰山南城人性至孝博學能文以道自守太原郭奕見之曰此今日顏子也文帝

為大將軍徵為中書侍郎泰始初詔稱祐執德清劬忠亮純茂經緯文武蹇蹇正直以祐為尚書右僕射率兵出鎮南夏綏懷遠近江漢歸心吳陸抗嘗稱其德量可媲美殷孔明後以時勢可乘上疏取吳雖寢疾猶入朝面陳伐吳之計及疾漸篤乃舉杜預自代年五十有八卒閱二年吳平帝流涕曰此羊太傅功

也因以尅定之功  
策告祐廟諡曰成

唐

彬

字儒宗魯國鄆人少有經國大度不拘行檢晚乃敦行悅經史初為郎門下掾舉孝廉累

遷別駕泰始初賜爵關內侯遷弋陽太守設禁防百姓安之加廣武將軍上征吳之策與王濬共伐吳彬也據要衝為前驅陷西陵樂鄉多所擒獲自巴陵沔口以東莫不震懼以彬都督巴東諸軍事四境獲安百姓追慕功德生為立碑作頌卒諡曰襄

魏

舒

字元陽任城樊人年四十餘郡上計掾察孝廉舒對策升第累遷後將軍長史轉相國參

軍凡遇微小事務未嘗見是非至於廢興大事衆人莫能斷者舒徐等之多出衆議之表文帝深器重之每朝會罷目送之曰魏舒堂堂人之領袖也遷宜陽榮陽二郡太守甚有聲稱徵拜散騎常侍出為冀州

刺史以簡惠稱太康初拜右僕射後領司徒卒諡曰康

陳

邵

字節良東海襄贛人郡察孝廉不就以儒學徵為陳留內史累遷燕王師撰周禮評甚有

條貫行於世泰始中詔曰燕王師陳邵清正潔靜行著邦族篤志好古博通六籍耽悅典誥老而不倦宜在左右以篤儒教可為給事中卒於官帝哀悼終日

劉

毅

字仲雄東萊掖人幼有孝行厲清節好臧否人物王公貴人望風憚之太康初為司隸校

尉糾正豪右京師肅然武帝嘗問毅曰朕可方漢何帝毅對曰可方桓靈帝笑曰桓靈之世不聞此言今朕有直臣固不同也毅端方亮直正色立朝罷中正除九品言議愷切無所曲撓夙夜在公坐而待旦累官至尚書左僕射

劉

暉

字長升東萊掖人尚書左僕射穀子正直有父風太康初為博士坐議忤旨免官後為酸

棗令轉侍御史劾奏司徒王渾無大臣節渾免官右長史揚邱亭侯劉肇便辟阿順暉請削其爵土聞者莫不歎美適武庫火尚書郭彰率百人自衛而不救火暉正色詰之彰怒曰我能截君角暉勃然曰汝敢恃寵作威福乎彰伏不敢言暉正色立朝三臺清肅如光祿大夫

孫益德

樂安人其母為人所害時益德尚幼奮然為母復讐還哭於殯以待罪事聞以其幼而孝

又不逃罪特免之及長郡辟中正辭不受

吳隱之

字處默濮陽鄆城人美姿容善談論博涉文史以儒雅標名父母相繼歿隱之每號泣行

人亦為流涕太常韓康伯與之鄰其母謂康伯曰汝若居銓衡當舉如此人及康伯為吏部尚書隱之遂

階清級累遷晉陵太守清儉勤苦終始不渝祿賜皆頒給親族嘗為廣州刺史廣有水曰貪泉隱之飲而賦曰古人云此水一飲懷千金試使夷齊飲終當不易心隱之在州清操愈厲後官至度支尚書

**郝詵**

字廣基濟陰單父人博學多才不拘細行太始中詔舉賢良直言對策上第嘗於武帝座

前自稱曰臣對策天下第一如桂林一枝崑山片玉仕至雍州刺史卒於官

**顏含**

字弘都瑯邪人少有操行以孝聞兄病廢含絕棄人事躬親侍養足不出戶者十三年石

崇重其行誼贈遺辭不受嫂病出明醫疏方須髯蛇膽遍求不得忽有童子持青囊授含乃蛇膽也童子化青鳥飛去入以為誠敬所感

**侯史光**

字孝明東萊掖人舉孝廉州辟別駕泰始初拜散騎常侍尋兼侍中持節循省風俗還奏



稱旨進爵臨海侯光在職寬而不縱有清忠之節  
文筆奏議皆可為法後卒家極貧詔賜錢伍拾萬

馬

隆

字孝興平陸人少有智勇好立名節泰始中  
舉隆為堪良將稱遷司馬督時涼州為寇所

沒以隆為武威太守隆到武威奇謀間發出敵不  
意涼州遂平進封高縣侯子咸嗣為鷹揚將軍

華

嶠

才典統撰集又自作漢紀  
高唐人歷仕魏晉有良史

王

弼

字輔嗣山陽人通辯能言鍾會服其高致嘗  
曰聖人茂於人者神明也同於人者五情也

神明茂故能體冲和以道無五情同故  
不能無哀樂以應物注周易及老子

汜

毓

字稚春濟北盧人累世儒素甘自高蹈時人  
號其家兒無常父衣無常主有好古者造廬

咨詢輒傾懷開誘嘗撰春秋釋疑肉刑  
論武帝召補祕書郎太傅叅軍並不就

徐苗

字叔胃淳于人少家貧晝則鋤耒夜則吟誦受業於濟南宋鈞遂為儒宗作五經同異評

守志不仕武帝惠帝時凡計吏至臺者輒手詔存問安否遠近咸師尊之

王戎

字濬冲瑯琊臨沂人父渾涼州刺史戎幼穎悟與阮籍為竹林之遊後襲父爵辟相國掾

累遷豫州刺史加建威將軍受詔伐吳戎遣參軍羅尚劉喬進攻吳昌吳率眾詣降戎渡江綏慰新附宣揚威惠進爵安豐縣侯戎以吳光祿勳石偉清節可嘉表薦為議郎永興二年卒諡曰元

卞粹

字元仁濟陰冤句人以清辯鑒察稱兄弟六人並登臺輔世稱卞氏六龍元仁無雙惠帝

初為尚書郎楊駿執政人多附會而粹正直不阿及駿誅超拜右丞遷侍中中書令長沙王又專權粹正

色立朝又忌而害之

卞俊

濟陰冤句人清正有識以名理著稱其鄉人  
郗詵每恃才陵俊俊亦素輕詵相視如讐詵

以揚駿故吏被繫俊時為尚書郎按其獄詵懼不免  
俊平心決斷詵卒以免其居心公正如此歷位汝南

相廷尉卿

解系

字少連濟南著人與二弟結育並以清潔著  
名初辟公府掾累遷雍州刺史會與征西將

軍趙王倫同討氏羌倫用佞人孫秀與孫爭軍事更  
相表奏朝廷知系守正召倫還系表殺秀以謝氏羌

不從倫秀譖之系免官及張華裴頠被誅倫秀以宿  
憾收系兄弟梁王彤苦爭之不得遂與二弟皆遇害

後倫秀既被誅齊王冏白其冤於朝追贈光祿大夫  
結字叔連累遭魏郡太守育字稚連累遭弘農太守

石鑒

字林伯樂陵厭次人出自寒素雅志公亮仕  
魏歷御史中丞多所糾正朝廷憚之元康間

累官至太尉八十餘卒諡曰元

劉寶

字子徵平原高唐人少貧賣牛衣以自給好學博通古今清身潔行郡察孝廉不就以計

吏入洛調為河南尹累官吏部郎叅相國軍事時鍾會鄧艾伐蜀寶料其皆不還後果然其先見類如此以世多進趨乃著崇讓論以矯之懷帝時終太尉諡曰元

劉智

字子房平原高唐人大尉寶之弟少貧窶每負薪自給誦讀不輟以儒行稱仕為潁川太

守累遷至尚書太常著喪服釋疑論多所辨明平原管輅嘗謂人曰吾與劉潁川兄弟語使人神思清發夕不暇寢卒諡曰成

王鑒

字茂高堂邑人父濟御史中丞鑒少以大筆著稱初為瑯邪國侍郎時杜弢叛鑒上疏勸

征之後拜駙馬都尉有大集傳  
於世弟濤及弟子猷並有才名

左思

字太冲臨淄人博學工詩尤善屬文嘗著三都賦構思十年門庭蕭索皆置筆紙偶得一

句輒疏之自揣所見不博求為祕書郎及賦成張華見而歎曰班張之流也豪貴之家競相傳寫洛陽為之紙

貴

張載

字孟陽臨淄人閑雅博學著劍閣銘又為濠汜賦傳元見而嗟歎以車迎之言談盡日起

家著作佐郎弘農太守長沙王又請為記室拜中書侍郎復領著作稱疾告歸

劉敏元

字道元北海人永嘉之亂同郡管平以年老從敏元西奔為賊所得敏元曰此公餘年無

幾願以身代賊首欲舍之一賊勿聽敏元奪劍前曰吾不惜死義不負同行者爾為賊顧不遵前長令耶

願為諸公先除此不從命者賊首遽止之相謂曰此義士也遂俱免之

繆

播

字宣則蘭陵人懷帝時為中書令掌詔命時東海王越威權日盛帝力不能討以播有公

輔之量又盡忠於國故委以心膺越懼為已害因以兵執播等害之

魏浚

東郡東阿人寓居關中懷帝以為揚威將軍及洛陽陷屯於洛北石梁塢撫戰士修罷備

其附賊者先諭以大晉運數靈長行已建立歸之者甚眾或恃遠不從命遣將討之服從而已不加侵暴於是遠近咸悅劉琨承制假浚河南尹劉曜忌浚得眾率軍圍之浚援絕夜遁為曜所得遂死之

劉印

字承尹東萊掖人漢齊悼王肥之後名著海岱士咸慕之舉賢良辟司空掾並不就會避

地冀州依刺史邵續續以徒眾寡弱謀降於石勒印為陳勝負之勢得失之機欲其戴瑯琊王以抗石勒

續從其言遣使江南朝廷嘉之印乃求自行續厚遣之既至元帝命為丞相叅軍累遷尚書吏部郎王敦素與印交請為右司馬印知敦有不軌心枕疾不就出為豫章太守豪右肅然咸和初以平蘇峻功賜爵豐城子後為郭默所害

胡毋輔之

字顏國泰山奉高人少擅高名嗜酒任縱王衍嘗稱其吐佳言如銘木屑霏霏不絕

仕晉守繁昌令節清自勵甚有能名終湘州刺史

王導

字茂弘瑯邪臨沂人光祿大夫覽孫少有風鑒識量清遠元帝為瑯邪王與導友善出鎮

下邳請導為安東司馬軍謀密策知無不為及從建康吳人不附導勸帝引顧榮賀循二人以結人心又勸帝收中州賢士與之圖事晉國既建導歷大將軍儀同三司以討華軼功封武岡侯及王敦有異謀導

率子弟詣臺待罪帝以導忠節有素特還朝服召見  
宥之明帝即位導受遺詔輔政王敦平封始興郡公

復與庾亮同受遺詔輔成

王彬

字世儒瑯琊臨沂人少稱雅正與兄廩俱渡  
江累官典軍參軍豫討華軼有功封都亭侯

歷侍中從兄敦舉兵入石頭帝使彬勞之彬數敦罪  
辭極慷慨敦大怒時王導在坐勸彬起謝彬曰有脚  
疾敦曰脚痛孰若頸痛彬意氣自若殊無  
懼容敦平徵拜光祿勳歷右僕射卒諡肅

王舒

字處明臨沂人司空導從弟父會侍御史元  
帝出鎮建康舒與諸父兄弟俱渡江而東叅

鎮東軍事褚裒鎮廣陵以舒為車騎司馬咸稱明練  
裒卒遂代裒累遷會稽內史秩中二千石會蘇峻獨  
獷舒率兵征討峻平以  
功封彭澤侯卒諡曰穆



魏

該

東阿人後族子元帝時為順陽太守王敦不軌甘卓以敦旨動之該曰王公舉兵向天子

非吾所宜與也拒之不應及蘇峻難作該率眾救臺軍次石頭城受陶侃節度以勞瘁卒於軍中

劉

超

字世瑜臨沂人少有志節從元帝渡江為安東府舍人專掌大檄及蘇峻犯關超為右衛

將軍峻遷帝石頭超與侍中鍾雅步侍左右臣節愈恭成帝時年八歲幽厄之中超猶啟授孝經論語謀奉帝出赴義軍事泄峻使任讓收超及雅帝抱持悲泣曰還我侍中右衛讓竟害之峻平帝誅讓贈超衛尉諡曰忠

卞

敦

字仲仁濟陰冤句人汝南相俊子弱冠仕州郡辟司空府遷尚書郎朝士多稱之元帝請

為軍諮祭酒不就征南將軍山簡以為司馬時王如杜曾相繼猖獗簡乃使敦監沔北七郡軍事攻討所

至皆平後從明帝討王敦有功  
封益陽侯徙光祿勳卒諡曰敬

孔

衍

字舒元孔子二十二世孫少好學通詩書舉  
異行直言皆不就避地江東明帝在東宮衍

領太子中庶子經學深博練識舊典朝儀軌制多取  
正焉後為王敦所惡出守廣陵所撰述百餘萬言

華

恒

字敬則高唐人博學清潔以駙馬都尉除散  
騎常侍累遷太常定郊禮太寧初王敦表為

護軍不拜至咸和初以討王敦功進封苑陵縣侯蘇  
峻逼石頭城恒侍帝左右備履艱困及帝加元服將  
納后恒推尋舊典撰定禮儀并郊廟辟雍朝  
廷軌則事皆施用遷左光祿大夫卒諡曰敬

徐寧

東海郟人少知名為興縣令時廷尉桓彝有  
人倫識鑒嘗過興縣乃造之寧清惠博涉相

遇欣然彝大賞之至都謂庾亮曰為卿得一佳吏部  
亮即啓帝用為吏部郎累官至左將軍江州刺史卒

於官

郝隆

字弘始高平金鄉人仕晉為尚書郎轉左丞以直亮為百僚所憚後為揚州刺史僚屬有

犯輒以臺閣峻制繩之尋加寧東將軍

郝鑒

字道徽高平金鄉人寧東將軍隆姪博覽經籍以儒雅著名趙王倫辟為掾鑒知倫中蓄

異謀遂稱疾去職惠帝復正累遷中書侍郎後隨元帝東渡明帝即位畏王敦之逼倚鑒為外援拜安西將軍都督揚州江西諸軍與帝謀討敦後與王導卞壺等同受遺詔輔少主出刺徐州及蘇峻為患鑒流涕誓師三軍爭為用命峻平拜司空仍還鎮廣陵封南昌縣公卒諡文成

竇盆

泰安人六世同居詔褒美賜粟帛

羊曼

字祖延泰山南城人少知名渡江為黃門侍郎晉陵太守以事免官與阮放郝鑒胡毋輔

之卞壹蔡謨阮孚劉綏號兗州八伯曼知王敦不臣終日酣飲故不與其難成帝時以前將軍守雲龍門蘇峻為逆王師不振或勸曼避之曼曰奈朝廷何勒衆戰不克而死峻平追贈太常卿

郝愔

字方回高平金鄉人南昌縣公鑒長子性至孝襲爵南昌公徵拜中書侍郎尋以疾去職

與王羲之許恂並有邁世之風修黃老之術後徵為光祿大夫固讓不拜求補遠郡出為輔國將軍久之乞歸徵拜司空不起卒諡文穆

劉

鯪

字長魚高密人幼不慕俗長而希古篤學厲行化流邦邑與城陽郗郁並有高名咸康中

成帝博求異行之士徵為博士鯪赴京師自陳年老不拜以壽終

卞壺

字望之，宛句人。侍中粹之子，弱冠有名譽。元帝鎮建鄴，召為從事中郎。成帝時，為右將軍。

尚書令與王導同心輔政，幹實當官。以褒貶為已任，庾亮將徵蘇峻，壺固爭不從。司馬任台勸壺宜畜良馬，以備不虞。壺笑曰：「以順逆論之，理無不濟。若萬一不然，豈須馬哉？」及峻進攻青溪，六軍失利，壺與二子眡，肝皆死之。眡母裴氏撫尸哭曰：「父為忠臣，子為孝子，吾復何恨乎？」

呂安

字仲悌，東平人。神氣超逸，博物能文。與向秀、稽康相友，極善。每一相思，輒千里命駕。後遭

譖，與康並見殺。向秀為作思舊賦。

孟嘉

字萬年，孟予二十二代孫。庾亮鎮武昌，拔為觀學從事。西安將軍府功曹，再為江州別駕。

又為桓溫參軍。溫甚重之，穆帝聞其名，賜見東堂，以脚疾不任拜，起詔使人扶入，其見優禮如此。

徐邈

東莞姑幕人東晉初徙居京口邈博涉多聞以慎密自居孝武帝時謝安舉為中書舍人

撰正五經音訓學者宗之在西省十年多所裨益轉祠部郎上南北郊宗廟迭毀禮皆有證據遷中書侍郎專掌綸綍所注穀梁傳見重於時

郝恢

字道尹金鄉人鑒之孫建威將軍曇之子少襲父爵散騎侍郎累遷給事黃門侍郎領太

子右衛率孝武帝深器重之以為有藩伯之望使鎮襄陽甚得闕隴之心降服者動以千計後以軍功加督隴將軍尋為尚書卒贈鎮軍將軍

伏滔

字元度平昌安邱人少以才學名舉秀才辟別駕皆不就大司馬桓溫引為叅軍時淮南

猖獗滔著論二篇名曰正淮溫稱賞之太元中拜著作郎專掌國史領本州大中正遷遊擊將軍子系之

亦有才官  
至光祿大夫

王珣

字元琳臨沂人內史洽之長子丞相導之孫弱冠為桓溫主簿時溫經畧中夏軍中機務

皆以委珣從討袁徽封東亭侯累遷侍中孝武深倚賴之時帝雅好典藉珣以才學文章見昵於帝隆安二年加散騎常侍卒諡獻穆

王珣

字季琰臨沂人內史洽季子少有才藝名出珣右歷國子博士黃門侍郎侍中代王獻之

為長史兼中書令二人素齊名世謂獻之為大令珣為小令卒贈太常

臧燾

字德仁東莞莒人少好學善三禮貧有操行晉太元中始立國學謝元舉燾為助教頃之

去官躬耕養親十餘年居喪以毀瘠著稱安帝時補尚書度支郎改掌祠部議京兆府君以上四主在太

祖之前情禮已遠宜從遷  
毀識者是之尋改大鴻臚

魏詠之

字長道任城人家貧躬耕好學不倦初為州主簿嘗與劉裕遊及桓玄不軌詠之協贊義

謀玄敗授建威將軍桓歆寇歷陽詠之率衆擊走之轉荊州刺史詠之初在布衣不以貧賤為恥及居顯位不以富貴驕人卒贈太常追封江陵縣公諡曰桓弟順之琅邪內史

何無忌

東海郅人少有大志忠亮任氣人有不稱其心者輒形於言色州辟從事轉太學博士鎮

北將軍劉牢之即其舅也時鎮京口每有大事必與參議牢之欲降桓玄無忌屢諫辭旨甚切與劉裕起義兵討玄玄聞之甚懼其黨曰劉裕烏合勢必不成玄曰劉裕勇冠三軍兼以何無忌劉牢之之甥酷似其舅何謂無成其見憚如此及玄潰走無忌與振武將軍劉道規同追之玄平奉帝還京師累遷會稽內



史督江東五郡軍事義熙二年封安成郡開國公後與盧循別帥徐道覆戰失利握節死之

**檀憑之**

字慶子高平人少有志力為世所稱從兄子韶兄弟五人皆穉幼而孤憑之撫養若已所

生初為會稽王驃騎行參軍累遷寧遠將軍與劉裕有州閭之舊又數同東討情好甚密義旗之建憑之與劉毅俱以私艱墨經而赴官次劉裕以為建威將軍後為皇甫敷軍所害追封曲阿縣公

**徐廣**

字野民東莞姑幕人謝玄鎮兗州辟從事累仕至祕書監及劉裕受禪恭帝遜位廣獨哀

感涕泗交流謝晦見之謂曰徐公將無小過廣收淚言曰君為宋朝佐命吾乃晉室遺老憂喜之事固不同時乃更獻教遂乞歸卒於家

**檀斌**

高平金鄉人明帝時為兗州刺史時石勒遣其將石良冠兗州斌因乏敕力戰死之

晏謨

臨淄人晏嬰後善屬文撰齊記行世南燕主慕容德登營邱問謨以齊之山川邱陵賢哲

舊事謨歷對詳辦畫地成圖德嘉之拜尚書郎

王猛

字景畧北海劇人少貧賤氣度雄遠博學好兵書徐統見而奇之召為功曹不應隱於華

陰山桓溫入關被褐詣之捫頰而談當世之事旁若無人溫異之請與俱往猛還山諮師師曰卿與桓溫豈並世哉乃止苻堅將有大志遣呂婆樓招之一見若生平及堅僭位以猛為中書侍郎累遷司徒錄尚書事率諸軍討慕容暉軍嚴禁明師無私犯遠近帖然以平燕功進封清河郡侯留鎮冀州俄入為丞相加都督中外諸軍事猛宰政公平流放尸素拔幽滯顯賢才外修兵革內崇儒學勸課農桑教以廉恥是以兵強國富垂及苻平臨卒堅問以後事猛曰晉雖辟在江左乃正朔相承願勿以晉為圖鮮卑羌虜終

為人患宜漸除之言  
終而沒諡曰武侯

房

豹

字仲幹清河人年十七為慕容紹主簿並行  
臺郎中紹宗云有水厄思自禳之豹曰命在

天豈人所能延促未幾紹宗遇弔時論以為知微遷  
樂陵太守階除簡靜固固空虛郡治頗海水多鹹苦  
豹命鑿一井得甘泉咸謂政化所致後  
辭疾歸終於家以上三人係燕秦附

## 南北朝

劉穆之

字道和東莞莒人少好書傳為府主簿後從  
宋武帝為軍吏平京邑任以腹心穆之盡誠

無隱累官中軍太尉司馬加丹陽尹武帝西討以諸  
葛長民監留府穆之輔之加建威將軍尋轉尚書僕  
射穆之內總朝政外供軍旅決斷如流事無壅滯後  
以佐命元勳追封南康郡公諡文宣配食高祖廟庭

孫瑀仕至御史中丞

臧熹

字義和宋東莞莒人與兄燾並好儒學熹更習騎射遇虎直前射之應弦而倒從武帝定

建業及桓玄走武帝使熹入宮封府庫有金飾樂器武帝問熹御得無欲此乎熹正色曰主上幽逼非所將軍首建大義雖復不肖實無情於樂以建義功封始興縣五等侯為臨海太守綏輯綱紀招聚流散後卒追贈光祿勳

王鎮惡

宋北海劇人符秦丞相猛之孫才畧縱橫果決能斷初為臨澧令武帝與語甚異之以拒

盧循有功封博陸縣子後屢平寇賊除遊擊將軍武帝北伐鎮惡領前鋒所至望風奔散及入長安撫慰初附號令嚴肅百姓安堵進號征虜將軍後為沈田子所害

檀道濟

高平金鄉人從宋武帝參建武軍事以建義勲封吳縣五等侯前後多戰功歷加冠軍將

軍義熙十二年武帝北伐以道濟為前鋒出淮淝所至降服拔城破壘俘四千餘人皆釋遣人心感悅長安既平為琅邪內史元嘉中封武陵郡公進位司空鎮潯陽道道濟立功前朝威名甚盛左右腹心並經百戰諸子又有才氣朝廷旋懼召赴廷尉與其子植等俱見殺

孔琳之

字彥琳孔子二十八代孫好文藝解音律妙草隸書當桓玄輔政進為西閣公以不肯順

玄旨故不見知累遷尚書左丞永初二年為御史中丞執法無所撓家貧不事產業著有文集十卷

劉兆

字延世東平人洽聞善誘從業者數千人宋武帝時五辟公府三徵博士皆不就以春秋

一經而三家殊塗乃合而通之作春秋調人又為春秋左解名曰全綜公羊穀梁解詁皆納經傳中朱書

以別之又傳

周易訓注

孟懷玉

平昌安邱人徙居京口宋武帝東伐孫恩以  
為建武司馬進定京邑以功封鄱陽侯盧循

逼京邑懷玉連戰有功遷江州刺史督六郡諸軍事  
尋丁父難上表陳解不許因抱薦疾卒弟龍符驍果

有幹力以軍功封平

昌縣子位車騎將軍

虞丘進

字豫之宋東海郢人少隨武帝討苻堅有功  
累官龍驤將軍封龍川縣五等侯盧循逼京

邑遷鄱陽太守統兵擊破之後討

司馬休之有戰功除輔國將軍

檀祗

字高叔宋高平金鄉人武陵郡公道濟從兄  
以參建武軍事加振武將軍屢立戰功封西

昌侯盧循逼京邑加輔國將軍屯兵西明門循即退  
走出督江北淮南軍事會司馬國璠兄弟聚眾數百

過淮乘夜緣廣陵城闌入祇曰賊闌入欲掩襲不備  
因今打五鼓賊懼曉皆奔散及宋國建以為領軍將  
軍諡曰  
威侯

王鎮之

字伯重琅邪臨沂人初仕晉為安成太守桓  
玄寇境鎮之拒戰彌年子第五人並臨陣見

殺加建威將軍徐道覆逼江  
陵鎮之討平之封華容縣男

何承天

東海郟人博見古今尤精歷數仕宋為尚書  
祠部郎撰朝儀遷御史中丞文帝每有疑議

必先訪之時開元武湖得古銅斗承天曰此新莽威  
斗也三公亡則賜之江左唯甄邯為大司徒必邯之  
墓驗之果然先是禮論有八百卷承  
天刪減併合以類相從凡為三百卷

王淮之

字元會瑯邪臨沂人明禮傳贍于文辭為山  
陰令有能名宋元嘉中為江夏王撫軍長史

歷陽太守行州府之任綏懷得理軍民便之明年為  
都官尚書改領吏部以性峭急失縉紳望出為丹陽  
尹淮之究識舊儀問無不對時彭城王義康錄尚書  
事歎曰何須高論虛無正得如王淮之兩三人天下  
便可治常撰朝儀朝  
廷遵用之卒贈太常

鮑

照

字明遠宋東海郟人官臨海王前軍叅  
軍嘗為古樂府文甚道麗有集傳於世

王

弘

字休元瑯邪臨沂人晉司徒珣之子弘少好  
學以清恬知名宋武帝為鎮軍召補諮議叅

軍累官江州刺史省賦簡役百姓安之永初元年以  
佐命功封華陽縣公及徐羨之等謀廢立召弘入朝  
文帝即位弘定策安社稷進位司空封建安郡公羨  
之等誅徵弘為侍中司徒上西征弘與彭城王義康  
居守明敏有思致造次必存禮法九年進位  
太保領中書監卒謚文昭配食高祖廟庭



王曇首

宋瑯邪臨沂人有識智旬度喜愠不見于色為鎮西長史初武帝謂丈帝曰曇首沈毅宰

相材也及丈帝即位以預誅羨之等議進位侍中領驍騎將軍上欲封曇首等出詔示之曇首曰賴陛下英察罪人斯戮豈可因國之災以為身利陛下雖欲私臣當如直史何上不能奪封事遂寢後追封豫寧

侯卒諡

曰大

王僧綽

宋瑯邪臨沂人豫寧侯曇首子好學有理思練悉朝典尚丈帝長女東陽獻公主為尚書

吏部郎拔才舉能咸得其分遷侍中任以機密丈帝以僧綽年少方欲大相付托僧綽刻自損抑求為吳郡不許後為助所害諡曰愍第僧達亦以大名仕齊為中書郎

徐孝嗣

字始昌宋東海郟人祖湛之仕至司空父聿之著作郎並為子助所殺孝嗣在孕得免幼

而風儀端簡八歲襲爵縣公尚康樂公主歷御史中丞出為吳興太守在郡有能名復徵為五兵尚書臺閣事多委之從世祖幸方山上欲于山南為離宮孝嗣以勞民諫止明帝時加中軍將軍轉尚書令器量弘雅不以權勢自居朝野共服其品

顏協

字子和宋瑯邪臨沂人博極羣書兼工草隸為湘東王記室撰晉書傳日月災異圖併文

集二  
十卷

顏延之

字延年宋瑯邪臨沂人好讀書無所不覽文章冠絕當時與陳郡謝靈運齊名嘗問鮑照

已與謝優劣照曰謝五言如初發芙蓉自然可愛君詩如鋪錦列繡亦雕績滿眼仕至光祿大夫卒贈特進子竣亦以文學顯

王僧孺

宋東海郛人六歲能文家貧其母鬻紗布以自業嘗攜僧孺至市道遇中丞鹵簿驅迫溝

中及長累仕尚書左丞兼著作俄除游擊將軍兼御史中丞拜日引駟清道悲感不自勝官至南康王諮議參軍聚書至萬餘卷多異本其為文麗逸多用新事人所未見者所著集十八卷州譜七百一十卷百家譜集十五卷東南譜集抄十卷文集三十卷兩臺彈事五卷及東宮新記並行于世

劉善明

平原人南齊安北將軍懷珍族弟父懷人仕宋為齊北海二郡太守元嘉末青州饑善明

出積粟以救鄉里咸呼其家田為續命田刺史劉道隆辟為中從事沈文秀兵起善明收集門宗部曲奔從懷恭於北海明帝以為北海太守魏克青州善明母陷焉乃布衣蔬食哀戚如初喪會遣北使善明舉北平田惠紹使魏贖母還後事齊高帝以為腹心歷淮南宣城二郡太守上表陳事十一條又撰聖賢雜

語奏之托以諷諫上深嘉其忠款封新塗伯諡烈伯

劉靈哲

字文明平原人仕宋為齊郡太守前軍將軍生母病躬自祈禱夢見黃衣老公與藥曰食

此可愈靈哲驚覺於枕間得之如言而愈嫡母崔氏及兄景煥泰始中為魏所獲父懷珍卒當襲爵靈哲因辭以兄在魏無容越當茅土帝哀之為請於魏送其兄還襲父爵靈哲位至兗州刺史

王素

字休業琅琊臨沂人少有志行家貧母老嘗為廬陵王門下侍郎及母死隱居東陽宋孝

武召為太子舍人辭不就山中有蛭蟲聲甚清長聽之使人不厭而其形甚醜素乃為蛭賦自況

趙僧巖

北海人家閭無常人不能測劉善明為青州刺史舉為秀才大驚拂衣去棲進巖谷間常

以一壺

自隨

周盤龍

北蘭陵人泰始間以軍功累至積射將軍元徽二年桂陽賊起盤龍拒戰大捷建元間敵

寇壽春盤龍於西澤中奮殺數萬人獲輜重無算魏人圍齊甬城盤龍子奉叔率二百餘人陷陣敵萬餘騎張左右翼圍之盤龍方食棄勛馳馬奮稍直突所向披靡奉叔已出復入求盤龍父子兩騎縈攪數萬人無敢當者由是名播北國以功進爵為侯

臧榮緒

宋東莞莒人幼孤灌園以供祭祀純篤好學括東西晉為一書記錄志傳凡一百一十卷

隱居京口教授齊高帝徵為主簿不就尤嗜五經謂人曰昔呂尚奉丹書武王致齋降位李釋教誠並有敬禮之儀因甄明至道乃撰述五經序論嘗以宣尼生庚子日陳五經拜之自號被褐先生以上俱南宋

桓康

蘭陵永人勇果驍悍宋泰始初與齊世祖起義世祖為郡所繫眾皆驚散康裝擔貯糗后

及二子負置山中與門客蕭欣祖等破郡獄出世祖  
郡兵追急康等死戰退之及世祖即位擢冠軍府叅  
軍南濮陽太守隨世祖征伐推堅陷陣南人震恐或  
畫其形以辟瘧無不立愈封吳平縣侯卒贈輔國將  
軍

崔祖思

字敬元清河東武城人崔琰七世孫初為都  
昌令轉相國從事中郎遷齊國內史建元元

年除黃門侍郎武帝時啓陳政事謂宜於太廟之南  
弘修文序司農以北廣開武校又謂宜體唐成儉踵  
虞為樸清置廷尉茂簡三官羅雜伎置鐘簴羽戚登  
歌上優詔報答後為青冀二州刺史為政清簡譴卑  
下士未幾卒  
上深惜之

劉軌思

渤海人說詩甚精少事同郡劉敬和敬和事  
程師則故其鄉曲多為詩者軌思仕齊位國

子博

王僧虔

琅邪臨沂人宋豫寧侯曇首子吏部郎僧綽弟性孝友端謹僧綽遇害撫其孤在宋為尚

書令後仕齊為侍中世祖即位以為光祿大夫開府儀同三司僧虔固辭謂僧綽子儉曰汝行登三事我若受此是一門二台司也吾實懼焉累年不拜儉嘗作長梁齋制度少過僧虔竟不入戶儉遂毀之

王慈

字伯重臨沂人僧虔子年八歲外祖江夏王義恭迎至內齋室物聽所取慈惟取素琴石

硯長仕南齊除秘書郎累官大司馬長史侍中領步兵校尉慈以朝堂諱榜非古舊制表請革除詔從之以為冠軍將軍將軍諡曰懿

王儉

字仲寶琅邪臨沂人宋吏部郎僧綽子明帝時解褐祕書郎遷祕書丞典校墳籍依七畧

撰七志四十卷上之又撰定元徽四部書目齊高帝為相深相推許既建國遷尚書右僕射時朝廷初基制度草創儉識舊事問無不答上歎曰維嶽降神生甫及申今天亦為我生儉也官至中書監諡文憲儉寡欲惟以經國為務車服塵素家無餘財

王逡之

字宣約琅邪臨沂人好學博聞至老不倦以著作郎兼尚書左丞叅定齊國儀禮初王儉撰古今喪服集記逡之難儉十一條更撰世行五卷建元間國學久廢逡之轉國子博士表請立學累遷光祿大夫給事中著書凡五十卷子穎上之詔付祕閣

檀超

字悅祖高平金鄉人少好文學舉止溫雅自比晉郗鑒孝武令直東宮歷兼左丞太祖愛之遷右長史建元間與記室江淹掌史職上表立條例詔內外詳議史功未就卒



孔珪

孔子二十九代孫好文詞齊高帝舉為記室與江淹對掌詞章上律丈二十卷

明僧紹

字承烈安陵人明經學隱居嶗山齊高帝屢徵不就乃錫以竹如意荀繹冠褒美之

劉懷珍

字道玉平原人幼隨祖奉伯至壽陽豫州刺史出獵百姓聚觀懷珍避不視奉伯異之長

辟本州主簿討平司馬順則讓功不居以應對取重江夏王隨府轉太宰叅軍破敵屢滿拜樂陵河間二郡太守斬豪民王弼宋泰始初累立戰功掩擊劉道蔚破王仲虢攻高密平昌陷不其擊降鞠延僧沈文秀遣使請降進冠軍將軍豫州刺史沈攸之起兵遣使結懷珍珍斬其使攸之攻鄆城懷珍遣將破其前鋒齊太祖輔政內召為都官尚書至明帝建元中轉光祿大夫授安北將軍卒諡曰敬

劉懷慰

字彥恭平原人安北將軍懷珍從弟父乘仁冀州刺史死於義懷慰持喪不食醢醬冬月

不川絮衣齊高祖以為護國將軍齊郡太守修城郭  
墾廢田決沈湖清身率下不受餽遺既卒明帝謂徐  
孝嗣曰劉懷慰若在朝廷不患無清吏也

**李安人**

蘭陵承人齊明帝時中領軍封康樂侯軍國  
密事上唯與安人論議謂曰署事有卿名我

便不復細覽也累遷尚書左僕  
射出為吳興太守卒諡肅侯

**吳苞**

字蓋天濮陽郟城人業文學善三禮宋太始  
中過江聚徒教授蔬食二十餘年至齊隆昌

年歸里梁武帝聞其名徵  
為太學博士不就以壽終

**崔慰祖**

字悅宗齊東武城人好學聚書至萬卷建武  
中帝欲試以百里辭不就吏部郎謝朓嘗于

省中賓友俱集問地里中所不悉十餘事慰祖酬據  
精悉朓嘆曰假使班馬復生無以過此所著有海岱

志

顏見遠

顏子之後博學有志行仕齊為御史中丞正色立朝有當官之稱梁武帝受禪見遠不食

發憤痛哭而卒帝恨之曰我自應天從人何預天下士大夫而顏見遠乃至於此以上俱南齊

王志

字次道琅邪臨沂人九歲居母憂哀客毀瘠仕齊為祕書郎累遷宣城內史清謹有恩惠

郡民爭田經歲不決聞志來遂相讓入為吏部尚書高祖入城百僚送款志不從上嘉之以為冠軍將軍丹陽尹為政清靜去煩苛以俸錢賑民民樂之官至散騎常侍金紫光祿大夫志善草隸號書聖兄弟子姪皆篤實謙和人稱馬蕃巷諸王為長者普通四年追諡曰安五子並知名

王僧祐

琅邪臨沂人書監儉從弟少穎悟為儉所重居喪至孝舉秀才為著作郎遷司空祭酒

常謝病不與公卿遊儉賓客盈門而僧祐不為之屈時人稱之

臧

嚴

字彥威東莞莒人幼有孝性孤貧勤學累遷湘東王參軍歷義陽武寧郡守郡界蠻地前

守鎮之以兵嚴獨隨數門人單車入境羣蠻悅服後為鎮南諮議參軍著有文集

孔休源

字慶緒孔子三十一代孫齊舉秀才仕梁至金紫光祿大夫諡曰貞手校書七千卷著文

集十  
五卷

徐

勉

字修仁東海郟人早勵清節篤志好學齊太尉王儉稱為宰輔器量射策舉高第起王國

侍郎梁天監初拜中書侍郎入樞府多所糾舉稱職尋除給事黃門侍郎參掌軍書劬勞夙夜經數旬始一還宅遷吏部尚書典選事彝倫有序嘗與客夜集有求詹事五官者勉正色曰今夕止談風月不宜及

公事進侍中高書右僕射盡心奉上知無不為有表  
奏輒焚其藁中大通三年卒贈光祿大夫開府儀同  
三司諡簡肅所著有別起居注  
六百卷選品會林等書行世

**呂僧珍**

字元榆東平范人童時有相者曰此封侯相  
也事梁高祖歷職冠軍將軍將軍封平固侯尋加

散騎常侍總知宿衛天監四年北伐軍機多事僧珍  
畫直中書省夜還秘書師旋授使持節南兗州刺史  
平心率下雖親戚不少私累有大勲恩遇隆密然性  
恭慎直禁中盛暑不解衣每侍御座鞠躬屏息天監  
十年卒於  
領軍府

**孫謙**

字長儒東莞莒人歷官南中郎司馬梁天監  
六年為零陵太守尋徵為光祿大夫高祖甚

禮異之自少至老歷二縣五郡所在廉潔課農桑盡  
地利收入常多於鄰境治煩以簡獄無繫囚威信並

著號為神明零陵多虎患謙至絕跡及去官復有謙居身儉素篤於行義年逾九十卒

臧

厥

字獻卿梁東莞莒人中領軍庾弟以幹局稱初為西中郎叅軍累職晉安太守郡居山海

常結聚逋逃討捕不能絕厥宣風化賊黨襁負而出居民復業商賈流通尋遷員外散騎常侍兼司農卿卒于官前後居職所掌職局大事及蘭臺廷尉所不能決者輒並付厥厥辦斷精詳咸得其理後有過登聞鼓鳴冤者曰乞付清直舍人高祖曰臧厥沒無可付者矣其見知如此

任

昉

字彥昇樂安博昌人早有才名性至孝居喪盡禮梁高祖執政罷重之以為記室叅軍尋

拜黃門侍郎天監二年出為義興新安太守為政清省能於路決詞訟吏民便之卒贈太常卿諡曰敬

王

規

字威明梁琅邪臨沂人書監儉孫僕射陳子八歲居母憂有至性徐孝嗣稱曰孝童父

亦罷重之十二通五經長起祕書郎累遷太子洗馬  
天監十二年獻新殿賦辭甚工襲封南昌侯除中書  
黃門侍郎普通初北伐規憂其難繼咸謂識事機馬  
高祖命賦詩五十韻饒元景隆援筆立就中大通二  
年為吳郡太守召還吏民千餘人詣闕乞留尋歷散  
騎常侍領步兵校尉辭不拜築室于鍾山崇熙寺居  
焉

崔靈恩

清河東武城人習五經尤精三禮三傳仕魏  
歸梁為步兵校尉兼國子博士解析經理甚

有精致舊儒咸稱重之先是儒者論天互執渾蓋二  
義不合靈恩立義以渾蓋為一集註毛詩周禮著三禮  
義宗左氏經傳義左氏條例  
公羊穀梁文句義皆行於世

王筠

字元禮臨沂人僧虔孫也七歲能屬文十六  
為芍藥賦甚美仕梁至光祿大夫太子詹事

昭明太子嘗集文士遊宴元圃獨把筠袖撫劉孝綽肩曰所謂左把浮邱袖右拍洪崖肩嘗奉敕製開善寺寶誌大師碑文詞甚麗逸又敕撰中書表奏三十卷及所上賦頌都為一集筠自撰其文章以一官為

一集凡一百

卷行於世

劉峻

字孝標梁平原人好學安貧耕讀不輟常燎麻炬從夕達旦間人有異書必往借之人謂

之書淫嘗著廣絕交論以刺世情武帝引見占對不稱旨乃作辨命論寄其懷思遊東陽紫岩山築室居焉著類苑一百二十卷卒諡元靜先生

卞華

字昭岳濟陰宛句人壺六世孫幼孤貧好學與平原明山賓會稽賀瑒同業友善梁天監

中為五經博士聚徒教授華博涉有機辭說經析理為當時之冠江左以來鍾律絕學至華乃通位尚書



儀曹

郎

明山賓

字孝若平原高人博通經傳梁初置五經博士山賓首應其選天監中出為北兗州刺史

東宮新置學士又以山賓為之初在州平陸縣不捨  
飲出倉米以賑百姓後刺史以為耗損有司追責籍  
其宅入官山賓不自理更市地造宅魚國子祭酒甚  
有訓導之益性疎通諸生皆愛之所著吉禮儀注二  
百二十四卷禮儀二十  
卷孝經喪服義十五卷

蕭子範

蘭陵人仕梁至光祿大夫南平王嘗使製千  
字丈其辭甚美自是府中文筆皆使草之前

後文集

三十卷

蕭子顯

子範弟偉容親身長八尺好學工屬大嘗探  
衆家後漢考正同異為一家之書又啟撰齊

史仕梁至吏部尚書出為吳興太守卒所著漢書齊書晉史外又有普通北伐記五卷文集二十卷子愷累官中書郎太子家令才學舉望時論以方其父

劉

勰

字彥和梁東莞人博學多才嘗撰文心雕龍五十篇欲取定於沈約因負書侯約于車前

若欲貨者約見書大重之言諸朝仕至東官通事舍人

何

遜

字仲言梁東海郟人宋御史承天子八歲能賦詩弱冠州舉秀才范雲見其對策大相稱

賞結忘年交自是一詞一詠雲輒嗟賞沈約亦愛其文仕至尚書水部郎所著文集八卷

蕭

洽

字宏稱北蘭陵人好學博涉善屬文仕至司徒左長史集二十卷行于世

臧

盾

字宣卿東莞莒人盾幼從諸葛璩受五經璩異之曰此王佐才也初為撫軍參軍尚書中

兵郎美風儀善舉止至梁高祖時進通事舍人宿直廷尉母忽卒手指痛不能寢父沒五年不出戶形體枯頽人不復識事聞上嘉之服闋累官御史中丞居憲臺公疆稱職大同二年遣中領軍尋拜光祿大夫

加金紫卒  
諡曰忠

劉

昭

高唐人晉太尉實九世孫幼清警通老莊義及長勤學善屬文仕梁卒于郢令集注後漢

書一百八十卷文集十卷子編亦好學通三禮仕魏尚書祠部郎次子緩風流跌宕名高一時為湘東王

中錄

事

徐 摛

字士秀東海郢人仕梁為晉安王侍讀遷新安太守勸課農桑教民禮義還為中庶子侯

景攻臺城賊衆舉兵上殿侍衛奔散摛徐謂景曰公當以禮見何得如此景乃拜太宗後被幽閉摛不獲

朝謁感氣疾  
而卒諡曰貞

徐陵

字孝穆東海郢人擣子八歲能屬文長博涉史籍仕梁為通直散騎常侍除御史中丞安

成王頊勢傾朝野府屬官多不法大臣莫敢言陵為彈章奏上前安成王侍立流汗失色陵即遣御史引王下殿自此朝廷肅然遷吏部尚書提舉綱維綜覈名實比之毛玠太建初除尚書左僕射陵固讓周弘正王勣曰選賢與舊微臣皆宜處後會北伐詔舉堪元帥任者陵推吳明徹裴忌卒用其言復淮南數十州累官中書監左光祿大夫陵罷局深遠性簡潔祿俸與親族共之詔策軍書多出其手為一代文宗卒

贈開國侯  
諡曰章

任遐

字景遠梁樂安博昌人少敦學業行誼純謹位御史中丞金紫光祿大夫

劉霽

字士開梁平原人立志勤學博涉書史歷位西昌相海鹽令所著有釋俗語八卷文集十

卷

劉杳

字士深平原人霽弟少好學淹貫羣書博物強記沈約任昉每有遺忘皆訪問焉仕梁至

尚書左丞所著有  
要雅高士傳等書

伏曼容

字公儀平昌安邱人少篤學善老易個儻好大言常云何晏疑易中九事以吾觀之晏了

不學也聚徒教授以自業仕歷宋齊梁終臨海太守嘗與司馬憲陸澄撰喪服生徒數十百人所著有周易毛詩喪服集解老莊論語義子宣傳父業為五經博士

伏

暉

字元耀平昌安邱人臨海太守曼容之子幼傳父業有名於時天監初授國子博士累官

中書侍郎前軍將軍出為永陽內史清潔務安靜刺史以狀聞詔勅十五事為吏民所懷高祖善之遷東陽太守厲志如永陽時尋徵長水校尉

劉歊

字士光平原人幼而穎悟及長博學多文不樂仕長與族兄訐遨遊山水間梁天監中卒

諡曰貞節處士

諸葛璩

瑯邪諸人安貧守志齊梁間屢徵皆不就

徐孝克

臨沂人性至孝梁太清中為太學博士侯景陷臺城京師絕糧百官廩祿不給孝克嘗出

其妻臧氏易米以養其母時稱孝子徐博士

江子一

字元亮濟陽人家貧以孝聞梁侯景之難子一戰失利武帝責之拜謝曰臣以身許國嘗

恐不得其死今所部皆棄臣去臣以一夫安能擊賊  
若賊遂能至此臣誓當碎身以贖前罪及景攻臺城  
子一與弟子四子五領百餘人開門出戰子一徑前  
刺賊從者不繼賊解其肩而去子四子五相謂曰與  
兄俱出何面獨旋  
皆免胄赴賊死

羊

侃

字祖忻太山梁甫人少瑰偉博涉書史尤好  
左氏春秋孫吳兵法授散騎常侍封高昌侯

除晉安太守境內肅清入為左衛率賜新造兩刃稍  
長丈四尺圍尺三寸侃乘馬試于上前特盡其妙上  
製武宴詩三十韻侃即席應詔累遷都官尚書侯景  
逼建康侃督都城內軍事備極區畫長子為景所獲  
舉以示侃侃曰吾以身許國豈以子生進退引弓射  
之賊亦感其忠義侃性寬厚有罷局醉客張儒才誤  
燔其船延燒金帛無筭侃命酒不輟且慰諭  
善待之太清二年卒于臺內以上俱南梁

張

譏

字直言清河武城人居父母憂哀毀逾禮仕梁為士林館學士侯景寇臺城譏獨侍太子

不去及臺城陷譏崎嶇避難卒不事景入陳為東宮學士所撰周易尚書毛詩孝經論語義皆入祕閣

王

憲

字顯則北海劇人自趙郡高邑歸誠于魏太祖曰此王猛孫也厚禮待之為廷尉卿遷上

谷太守清身率下風化大行尋拜外都中都大官斷獄稱旨進爵北海公以元老賜錦繡絳綠珍羞禮膳

卒諡曰康

崔

宏

字元伯清河東武城人學貫古今不與世羣太原郝軒稱為王佐才太祖時以黃門侍郎

通署三十六曹制度禮樂皆所裁定太宗即位詔坐止車門右總理萬幾河西建興河內獬豸賴以蕩平

拜天部大人進爵白馬公諡曰文貞弟徽字元猷官至中書侍郎



高允

字伯恭渤海人少有奇度清河崔宏見而異之曰一代偉器從安樂王範鎮長安以匡益

功賜爵汝陽子世祖時與崔浩述成國記浩坐罪允在帝前申釋是非毫無推諉聽者莫不稱善允歷三朝屢陳忠悃除田禁興學校親賢遠佞正己率下皆維持風化拔本塞源之論卒諡曰文所著有公羊繹毛詩拾遺等書

崔浩

字伯深武城人白馬公宏子博通經史元象練習制度累遷光祿大夫掌朝廷禮儀軍國

書詔景穆時內外大事皆先諮浩然後施行神麇二年總裁史務叙國書三十卷以是獲罪浩自謂才比張良而稽古過之第覽以善養知名歷中書侍郎叅著作事

崔懷慎

東武城人父邪利魯郡太守宋元嘉中入魏懷慎布衣蔬食如居喪禮歲時北向流涕泰

始初淮北陷懷慎因北至代都邪利已死懷慎號哭  
絕而復甦載喪還家徒跣冰雪手足不傷時人以為  
感孝

王肅

字恭懿瑯琊臨沂人晉丞相導之後父與及  
兄弟並為肅頤所殺肅自建業奔魏高祖引

見問故甚哀惻之語及為國之道深合上意除輔國  
大將軍長史討蕭鸞義陽降者萬餘世宗時與咸陽  
王禧同為宰輔憂勤經綜有過親舊持節都督江西  
軍事生擒肅將李叔獻得其地壽昌進位開國侯肅  
頻在邊境遠近歸懷清身好施家無餘  
財諡曰宣簡肅宗初復為立碑勒銘

傅永

字修期清河人驍勇過人兼有才筆王肅為  
豫州以永為平南長史肅將魯康祚趙公政

衆號一萬侵豫之太倉口永勒甲士三千拒之生擒  
公政斬康祚首送京師尋復與裴叔業戰一月之餘

遂獻再捷拜貝邱縣開國男救彭城王勰于壽春出  
中山王英于義陽單騎突陳洞眼拔箭三軍莫不壯  
之高祖每嘆曰上馬能擊賊下馬作  
露布唯傅修期耳卒贈齊州刺史

崔亮

字敬儒清河東武城人初為中書博士高祖  
創革舊制以亮才望素著授尚書左丞亮叅

選事廉慎明決垂及十年尚書郭祗每曰選事非崔  
郎中不辦後遷度支尚書別立條格歲省億計又議  
修汴蔡二渠以通邊運公私賴焉亮性公清敏  
于剖決所在稱職三輔服其德政諡曰貞烈

李彪

字道固衛國人舉孝廉高祖初為中書教學  
博士遷秘書丞上封事七條高祖覽而善之

尋皆施行累遷御史中尉彪性剛直多所糾劾豪右  
屏氣遠近畏之帝嘗謂羣臣曰吾有李生猶漢有汲  
黯又嘗宴羣臣於流化池謂僕射李冲曰崔光之  
博李彪之直是我國得賢之基後至度支尚書

王榮世

冠氏人仕魏以方城縣子為三城主梁師攻圍急榮世力窮知不可全乃先焚府庫繼殺

妻子奮身迎敵力戰而死

呂羅漢

壽張人仁篤慎密弱冠以武幹知名隨父溫佐秦州時揚難嘗寇上邽鎮將簡千騎令出

戰羅漢策馬大呼直衝隊壘衆皆披靡引退狀聞徵羽林郎中擒王飛廉黨八十餘家招慰懸弧降者九千餘戶頻破野貽賊兵以功加建威將軍蠕蠕犯塞羅漢都督中外軍事出為秦益二州刺史威惠兼著遠近歸懷卒諡曰莊一作呂河漢未詳

崔休

字惠盛清河人少孤貧矯然自立舉秀才拜尚書主客郎轉給事黃門侍郎高祖南伐以

休人望留總百揆還除渤海太守廣布耳目誅戮豪滑俎豆肄業儒者稱道不置入為吏部郎中多所選

拔遷司徒右長史剖判若流刺史青州青州九郡民  
劉通等一千人上書頌德上嘉之休久在臺閣明習  
典禮朝廷疑議咸取  
決焉卒諡曰文貞

**房法壽**

清河繹幕人少勇果州辟主簿以母老不應  
後仕魏屢立戰功威名震赫賜爵壯武侯加

平遠將軍給田宅奴婢性好施與親舊賓  
客率同饑飽坎壈常至不給卒諡曰敬侯

**房堅**

字千秋清河繹幕人持躬有道治家嚴肅高  
祖時為齊州大中正帝嘗令羣臣各舉所知

堅與幽州中正陽尼皆舉其子高祖曰昔有一祁  
名垂往史今有二奚當聞來牒遷堅濮陽太守

**路特慶**

字伯瑞陽平清淵人有幹用與廣平宋龔齊  
名相州刺史李安世表薦之太和中除奉朝

請自謂才望不逮讓于從兄大舉高祖遂並  
拜焉累遷河間王琛長史屢進直言諡曰襄

房亮

字景高清河人太和中除平原太守冀州刺史京兆王愉謀異以境接平原遣使說亮亮

斬其使者發兵防捍親總義師出城拒戰大破之遷前將軍東荊州刺史悉心撫納中外以安例邊州刺史得一子出身亮不言其子而啓第子起議者嘉焉卒贈齊州刺史

傅豎眼

清河人沈毅壯烈王肅表為叅軍屢建功績世宗時除建武將軍討揚州寇武興善于綏

撫南人多歸附之拜益州刺史蜀人仰其恩信請軍者旬月相繼及解州追隨涕泣直達境外尋除平西將軍與蕭將張齊對壘三日之中轉戰三百餘里頻致九捷功成轉梁州刺史州人喜迎于路卒贈吏部尚書

張彝

字慶賓清河武城人性公正歷涉經史世宗時以散騎常侍持節巡察陝西河南十二州

所至人皆畏服同寮以是高之還除秦州刺史考訪典式多所制立風移俗易隴右肅然入拜光祿大夫上歷帝圖帝嘉納之諡曰文侯

蔣少游

博昌人有文思高允愛其大薦之補中書博士後為太常少卿卒贈龍驤將軍青州刺史

諡曰質有大集十卷行世

崔光

清河郿人本名孝伯字長仁孝丈賜名光家貧好學晝耕夜讀泰和六年拜中書博士著

作郎與李彪參撰國書孝丈稱其才曰浩浩如黃河東注今日之丈宗也累官司徒侍中進太保封平恩侯卒諡

文宣

鹿生

濟陽乘氏人顯祖時為濟南太守時三齊新附人懷苟且蒲博終朝頗廢本業生立為首

免連坐之法保伍自相糾  
察勸懲有方民咸力作

劉獻之

博陵人少而孤貧雅好詩傳曾受業於渤海程元嘗謂人曰人之立身雖百行殊塗準之

四科要以德行為首人若能入孝出弟忠信仁讓不待出戶天下自知不然雖復下帷針股躡屨從師止可博聞多識不過為土龍祈雨眩惑將來其于立身之道有何益乎孔門之徒初亦未悟見臯魚之嘆乃歸而養親嗟乎先達何自覺之晚也獻之兼善春秋每講左氏盡隱公八年而止云義例已了不須復解弟子有莫究其說者舉孝廉不就孝文帝特詔徵興內校書仍以疾辭

崔鴻

郿人平恩侯光從子博綜經史撰十六國春秋勒成百卷仕至尚書都兵郎中遷平州刺

史卒諡曰貞



董徵

字文發頓邱衛國人好古學尚雅素師事博陵劉獻之通受諸經大義精練仕魏為四門

小學博士宣武召入璵華宮令孫惠蔚問以六經仍詔徵教授諸生官至光祿大夫

韓靈珍

魯郡人母喪三年貧無以葬與弟靈敏共種瓜半畝欲以營殯及熟朝採以賣至暮復生

遂克葬

房景伯

字長暉清河繹幕人壯武侯法壽族子少喪父傭書自給養母甚謹累遷齊州輔國長史

攝行州事政存寬簡百姓安之尋除東清河太守劉簡虎曾失禮于景伯聞其臨郡闔家逃亡景伯捕獲之即署其子為西曹掾詔喻山賊賊以不念舊惡一時俱下將代郡郡民韓靈和等三百餘人表訴乞留復加二載卒贈齊州刺史

房景先

字光宙清河繹幕人幼孤貧無資從師其母自授毛詩曲禮畫則樵蘇夜誦經史遂大通

瞻魏太和中舉秀才解褐太學博士修國史累遷齊州中正所歷皆有當官稱沈敏方正事兄景伯如嚴父兄常獲疾景先侍湯藥衣冠不解作五經疑問百餘篇

蓋儁

魯郡人六世同居家門雍睦上聞旌表

張烈

字徽仙清河東武城人博涉經史與崔徽伯房徽叔並有令譽時人號曰三徽官步兵尚

書每論軍國大事深合上意蕭寶卷入寇除陵江將軍順陽太守先車駕南征被圍七十餘日士卒愈奮蕭兵遁走封清河縣開國子後辭老還里兄弟同居怡怡然為親黨所慕卒垂家誠千餘言不聽求贈

田真

朝城人與弟慶廣同居諸婦欲分異堂前有紫荆樹一株甚茂兄弟共議破而為三一夕

樹即枯死真驚謂弟曰木本同株當分析便憔悴我兄弟孔懷而可離是人不如樹也兄弟相感更合諸婦亦無閒言明日荆復榮

崔挺

字根雙博陵安平人文帝時光州刺史恩威並著教化大行散騎常侍張彝巡行風俗嘗

謂人曰入境觀政時聞清吏之名崔公一人而已掖縣老人有美玉獻之挺不受及代去官屬贈以縑帛亦不納後卒於家光州人聞之為鑄八尺銅像於廣福寺中凡資薦冥福者必先拜崔公像謂其能為民致福云

高顥

字門賢渤海人博學有時譽自司空叅軍轉員外郎出為冀州別駕叅決李平軍機表釋

元愉別黨千餘人事平仍述職時軍旅之後因之饑饉顥為網紀務存寬厚尋除輔國將軍卒諡曰惠

樂運

清陽人文帝時為高唐令有聲績嘗錄夏殷以來諫諍事集名諫苑上之帝嘉覽焉

王昕

字元景劇人北海公憲曾孫仕後魏累官常侍初汝南王悅辟為騎兵叅軍悅好逸遊喜

酣飲昕每以正言却之累遷東萊太守武帝甚敬憚之時或袒露與侍臣戲狎見昕即正冠敔容後遷秘

書監昕母崔氏有學識生九子並風流蘊藉世號王氏九龍

房景遠

字叔暇平原繹幕人齊州刺史景伯弟重然諸好施與值歲饑饉以積粟分贍宗親久於

通衢煮粥以飼餓者益州刺史傅豎眼表為治武府功曹叅軍以母老固辭不受

張僧皓

臨淄人博極羣書北魏熙平以至孝昌凡三徵皆不就號曰徵君

何魯

字素臣益都人元魏時嘗蓄書數千卷朝夕吟咏自樂每謂人曰生逢多難苟能去危就

安全身遠害啟足無愧老氏  
戒名之意則可謂云爾已矣

刁雙

字子山青州樂安人博涉經史為中山王英所知拜西河太守正光初中山王熙坐罪第

畧投雙雙護之周年畧求南轉遣從子昌送達江左事覺上義之肅宗末除兗州刺史州人張挑弓等聚眾劫掠雙諭以禍福不究其罪盜發悉令追獲境內肅然尋行濟州刺史以功封曲城鄉男諡曰清穆

路邕

陽平清洲人世祖時東魏郡太守有惠政當代去民詣闕留之靈太后詔曰邕蒞政清勤

善綏民俗比經年儉羣庶嗷嗷將就溝壑而邕自出家粟賑濟貧窘民以獲安古之良守何以尚茲其班

宣各  
州鎮

路思令

字季雋陽平清洲人初為廣陽王司空參軍上疏曰德可感義夫恩可勸死士陟黜幽明

練兵習武先喻以禍福而後討之豈異厲蕭斧而發  
朝菌鼓洪爐而燎毛髮拜左將軍南冀州刺史時苗  
榮謀異思令潛軍夜往出其不意大  
破之除征東將軍金紫光祿大夫

崔衡

字伯玉清河人武陵公寬子以孝行著初為  
秘書中散掌詔命舉李冲程駿等終為名器

世以是稱之遷內都坐令折獄明允進爵齊郡公除  
秦州刺史衡陳禦備之方五十餘條便國利民行于  
秦周年之間寇盜止息卒  
贈金紫光祿大夫諡曰惠

路去病

陽平清澗人釋褐開府叅軍尋為定州饒陽  
令寬厚廉平吏民嘆服轉成安令居輦轂下

舊號難治功臣內戚請囑百端去病以理抗之莫  
不憚其風格亦不致嫌恨一時治術獨稱首焉

崔光韶

清河東武城人尚書亮從弟博學強辨篤于  
倫理仕魏為秘書郎掌校華林御書遷青州

平東府長史勅知州事清直明斷吏民咸畏愛之孝  
莊初河間邢杲攻逼州郡州人乞亮為長史以鎮之  
亮臨機處分在難確然朝廷嘉其忠毅發使慰勞還  
為東道軍司遷廷尉卿執法不撓權貴凜然自謂立  
身無慚古烈焉  
卒贈青州刺史

崔光伯

清河東武城人孝莊帝時北海太守秩滿更  
代帝詔曰光伯自蒞海沂清風遠著其兄光

韶辭榮侍養兄弟忠孝宜有  
甄錄再申三年以勵風俗

王晞

字叔朗北海人東萊太守所弟幼而孝謹淹  
雅有器量魏永安初徵署廣平王開府功曹

史晞願養母竟不受署母終後逮遊輩洛適意山水  
與范陽盧元明鉅鹿魏季景結侶往天陵山浩然有  
終焉之志昭帝時以侍中遷大鴻臚加儀同三司監  
修起居注晞閒談寡欲雖王事鞅掌而雅操不移在

并州戎馬填閭  
不以世務為累

**房士達**

清河繹幕人壯武侯法壽族弟少有才氣族  
兄景先每曰此兒個儻終當大其門戶起家

濟州左將軍府倉曹參軍拜平原太守邢景憚其威  
名越城西度不敢攻逼尋轉濟南太守不入京師頻

為本州郡時人榮之永安末洛人逐其刺史蕭  
贊請士達代遂攝州事贈齊州刺史諡曰武蕭

**崔彥穆**

清河東武城人幼明悟習儒業魏吏部尚書  
李神偶嘆為王佐才永安末累遷大司馬從

事中郎孝武西遷彥穆不得從乃與兄彥珍舉義拔  
滎陽擒東魏郡守蘇淑攻潁川斬其刺史李景道孝

武嘉之歷進司農卿時軍國草創衆務殷繁周太祖  
為相召入幕府兼掌文翰以本官從于謹伐江陵平

之世宗初加驃騎  
將軍進爵東郡公



高諒

字修賢渤海人輔國將軍顯弟居喪以孝聞累官徐州行臺彭城元法僧謀逆逼諒不從

遂遇害詔曰臨危授命誠節可嘉贈平北將軍諡曰忠

顏髦

字君道顏子二十代孫父喪在殯隣家失火髦與二弟抱棺號泣燹燭垂及忽爾頓絕人

以為孝感歷仕至黃門侍郎卒諡曰宣

賈思伯

字仕休齊郡益都人仕魏為廷尉卿自以儒素為業不好法律孝明帝時議建明堂多有

同異思伯乃上議考據詳核學者善之後為都官尚書以崔光薦入授明帝杜氏春秋接誘儒生恂恂無倦色客有謂曰公今貴重寧能不驕思伯曰衰至便驕何常之有當世以為雅言

賈思同

字仕明益都人少與兄思伯師事北海陰鳳授靜帝杜氏春秋拜侍中時國子博士遼西

衛冀隆精服氏學上書難杜氏六十三事思同復駁  
冀隆乖錯者一十餘條互相是非積成十卷詔下國  
學集諸儒考之事未  
竟而思同卒議遂寢

王

衍

字大舒琅邪臨沂人開國侯肅姪自著作佐  
郎累遷西兗州刺史屈治未幾為余朱仲遠

所擒以其人望不害久乃見釋還除車騎將軍左光  
祿大夫卒諡曰文獻勅給東園秘器衍篤于故舊友  
人竺玘妻子饑寒迎之于家  
累年贍恤世人稱其敦厚

張

軌

字元軌濟北臨邑人少好學志識開朗周太  
祖以為都督從征侯莫陳悅悅平時太祖為

行臺授軌郎中魏孝武西遷出為河北太守聲績甚  
著有循吏風累遷隴右府長史軌性清素臨終家無  
餘財惟有書數  
百卷以上北魏

崔

瞻

字彥通武城人有大學美風度初潁州荀濟自江南入洛瞻言于齊神武召為諸子賓友

嘗聘陳詞韻溫雅南人欽服累官銀青光祿大夫卒諡曰文

趙彥深

平原人本名隱避齊廟諱因以字行幼孤貧事母至孝性聰敏善書計安閑樂道不雜交

遊為雅論所歸服徵為大丞相功曹參軍專掌機密文翰多出其手神武嘗謂司徒孫騰曰彥深小心恭慎曠古絕倫天保初累遷秘書監出為徐州刺史政尚恩信吏民懷之後進爵樂安公

崔仲文

武城人有大學天保中兄悛為侍中仲文為光祿大夫同日受拜時號兩鳳聯飛嘗勅為

觀射詩十首操筆立就後拜散騎常侍卒

羊烈

字信卿泰山鉅平人少通敏好讀書以元學知名弱冠州辟主簿天保初授太子步兵校

尉輕車將軍累遷尚書祠部左右司郎中所在稱職九年除陽平太宇有能名皇建二年遷光祿少卿加龍驤將軍兗州大中正後以老疾歸里子元正民部侍郎

崔

劼

字彥元平原貝邱人少清虛寡欲好學有家風天保初除給事黃門侍郎加國子祭酒直

內省典機密清儉勤慎甚為顯祖所知拜南青州刺史有政績皇建中入為秘書監轉五兵尚書監國史在臺閣中以簡正見稱出為兗州刺史卒贈尚書右僕射諡文正

楊

愔

字遵彥本華陰人徙居清河又徙居萊初為齊高歡行臺右丞時霸圖革創文檄教令皆

自惜出韓陵之戰愔每陣先登朋僚咸嘆曰楊氏儒生今遂為武士仁者必勇定非虛論會從兄幼柳為岐州刺史以直言忤旨見誅愔聞之悲懼因逃亡棄衣冠于水濱若自沈者變易姓名自稱劉士安入田

橫島以講誦為業後神武知惜存以禮致之復授大  
行臺右丞累官開府儀同三司特進驃騎大將軍封  
開封王惜典選二十餘年以獎擢  
人材為已任魏齊際稱為名臣云

高綽

字僧裕渤海人汝陽子允孫少孤恭敏自立  
拜奉朝請除侍御史轉洛陽令為政公直不

避豪貴邑人憚之詔參律令遷國子博士大乘賊起  
詔以白虎幡軍招慰降之還為濟州刺史有治績卒  
諡曰簡

羊敦

字元禮泰山鉅平人性尚簡素博涉書史以  
父靈引死王事除給事中累遷廣平太守有

能名屬歲饑饉使人採藕根食之遇有疾苦家人解  
衣質米以供朝廷嘉其清白賜穀一千斛絹一百疋  
卒贈吏部尚書諡曰貞吏民奔哭莫不  
悲慟武定初復與蘇淑以善政追獎

張買農

平原人經義該博門徒千餘人諸儒咸推重之仕北齊歷太學博士國子助教

李局

字寶鼎北海人九歲入學書急就章月餘便通家素貧常春夏務農冬乃入學局以鄉里

無可師者乃詣華陰徐遵明門下受業五年稱徐高第年二十三撰定孝經論語毛詩三禮義疏及三傳異同周易義例天保中除太學博士局以去聖久遠文字多有乖謬遂覽說文倉雅刪正六藝經註中謬

字名曰  
字辨

鮑季詳

渤海人明禮無通左氏春秋少時恒為李寶鼎都講後亦自有徒眾諸儒稱之為齊太學

博士從弟長暄無通禮傳為任城王潛丞相掾恒在都教授貴游子弟齊末卒于家

孫靈暉

長樂武強人少明敏有器度日誦數千言三禮三傳皆通宗旨時就鮑季詳熊安生質問

疑滯其所發明熊鮑無以異也後舉秀才以儒術甄明授太學博士北齊天統中為南陽王師以上俱北齊

王褒

字子淵琅邪臨沂人七歲善屬文起家秘書郎累遷安成郡守侯景渡江掇建業褒輯寧

所部見稱於時元帝嗣位褒旬月間位昇端右愈自謙損及于謹征江陵獲都督城西諸軍深自勉勵盡忠勤之節後隨元帝出降太祖得之大喜恩盼異眾保定初高宗作象經令褒注之引據該洽甚見稱賞褒有龍局雅識治體建德後頗叅朝議授少司空聲著南北

李崇

字永隆高平人英果有籌算在周以父賢勲封迴樂侯起家州主簿辭不就官求為將兵

都督隨宇文護伐齊屢以功勲封宗縣公尋為懷州刺史進爵郡公

田弘

字廣路高平人勇敢有謀畧歸周太祖深被引納進爵為公從太祖復弘農戰沙苑解洛

陽圍破河橋陣賜姓紇干授原州刺史魏廢帝元年加驃騎大將軍開府儀同三司平蕭韶又討西平鳳州羌氏及信州羣蠻保定元年出刺岷州動遵法式百姓又安從隋公東伐還會吐谷渾寇西邊弘討之獲其二十五王拔七十二柵尋復破齊將段孝先拔宜陽弘每臨陣摧鋒直前身被一百餘箭破骨者九馬被十稍朝廷壯之建德中拜大司空遷少保子恭嗣爵觀國公其後亦顯於隋唐

唐瑾

字附璘北海平壽人溫恭有器量博涉經史周文帝聞其名召拜尚書員外郎從破沙苑

戰河橋遷尚書右丞吏部郎中並參朝章國典賜姓宇文更轉吏部尚書員人倫鑒為六俊之最于謹伐江陵軍中謀畧多出瑾江陵既平衣冠沒為僕隸瑾察其才行有片善者輒議免諸將皆務掠財物瑾所



收惟墳籍而已進爵為公歷刺蔡柘硤三州所  
在有德化累除司宗中大夫贈小宗伯諡曰方

**房彥謙**

字孝宗清河武城人徙居章邱天性穎悟通  
涉五經在北齊為齊州主簿在職清簡境內

肅然隋開皇間以刺史韋藝固薦遷監察御史奉詔  
按撫泉括等十州以銜命稱旨時左僕射高顯定考  
課彥謙諷以遠布耳目精加采訪褒秋毫之善貶纖  
芥之惡類嗟賞之以秩滿遷長葛令有惠化仁壽中  
使省巡察長吏以彥謙為天下第一起授鄆州司馬  
州務皆歸彥謙有異政煬帝即位徵授司隸刺史慨  
然有澄清天下之志薦舉彈射胥當其可  
而頗為執政者所嫉出為涇陽令卒於官

**張龠**

字大懿清河東武城人家子隄陰好兵書尤  
便刀楯周時鄉人有密引陳寇至者龠父雙

自清河太守免歸欲率子弟擊之未決龠贊成其謀  
竟以破賊由是知名起家州主簿高祖作相授大都

督領鄉兵賀若弼之鎮壽春也。薊恒為間謀。平陳之役。頗有功。馬進位開府儀同三司。封文安縣子。後屢立戰功。為行軍總管。

崔儼

字岐叔。清河武城人。博覽羣言。多所通涉。在北齊舉秀才。為員外散騎侍郎。遷殿中侍御。

史議五禮修律。令尋奉使聘于陳。與頗邱李若齊名。隋開皇四年。徵授給事郎。累遷員外散騎侍郎。

顏之推

字子介。臨沂人。仕北齊為散騎侍郎。齊亡。入周。為御史上士。隋開皇中。召為文學博士。博識才。

辨有大集三十卷。家訓二十篇。行於世。

鮑宏

字潤身。東海郳人。年十二。能屬文。初為學士。累遷遂伯。下大夫。嘗陳取齊之策。及定山東。

賜爵平遙伯。隋高帝時。加開府除利州刺史。進爵為公。有集十卷。行世。

明克讓

字弘道平原禹人梁兗州刺史山賓之子博涉書史三禮論語尤所研精仕梁入周為露

門學士武帝令與太史官屬正定新歷隋大帝受禪位率更令太子以師道處之詔與太常牛弘修禮議

樂當朝典故多所裁正著孝經義疏一部古今帝代記一卷文類四卷子餘慶為越王侗國子祭酒

房恭懿

字慎言清河東武城人開皇中為德州司馬考績為天下最帝謂諸州朝集使曰房恭懿

愛養我百姓乃上天宗廟之所佑助豈朕寡薄之所能致其即拜為刺史以風天下

段大振

北海人少強于力有膽氣性剛直明達時務初仕周及歸高祖累有戰功為行軍總管煬

帝即位從征吐谷渾有功進位右光祿大夫及遼東之役授左僕衛大將軍出南蘇道在道疾篤上疏言諸軍宜星馳速發水陸並進出其不意勢可拔也遂卒于師帝省表悲嘆贈光祿大夫北平侯諡曰襄

封肅

字元邕渤海人博涉經史仕至尚書左中兵部所著文集十餘卷

翟普林

楚邱人躬耕邑養父母終廬於墓側負土成墳冬月不衣繒絮家一烏天相隨普林悲慟

天亦哀號聞者莫不嘆異  
大業初辟為孝陽令不受

徐則

東海郟人沈靜寡慾懷棲隱之操常曰名者實之賓也吾其為賓乎隱於天台山

包愷

字和樂東海人兄愉明五經愷傳其業又從王仲通受史記漢書大業中為國子助教聚

徒教授著錄  
常數千餘人

張虔威

字元敬清河東武城人性聰敏涉獵羣書在北齊為太常丞隋開皇初為晉王叅軍及即


位加開府拜謁者大夫從幸以本官攝江都贊治稱為幹理帝數巡行百姓疲弊虔威上封事以諫由此

見疎子爽仕  
至蘭陵令

張虔雄

武城人虔威弟有才器為秦孝王叅軍王嘗  
親按囚徒虔雄誤不持狀口對百餘人皆盡

事情同輩嘆服後歷壽春陽城  
二縣俱有治績以上俱北周隋



山東通志卷二十八之一